



西湖遊覽志第十一卷

錢唐田 汝成 輯

北山勝蹟

自合澗橋折而南度佛國山門為下天竺講寺靈鷲  
峰月桂峰稽留峰蓮花峰三生石翻經臺香林洞葛  
塢葛井神尼舍利塔

佛國山門舊為鍾離權書後改張即之書今所懸  
乃南天皇明涼國公署額蓋僧家者流托權勢  
以為重未必真藍氏手筆也

下天竺寺坐靈鷲山麓亦晉僧慧理建隋開皇十



五年有僧真觀者錢唐人操行高潔掌有僊文  
與禪師道安頭陀石室檀越陳仲寶拓而修之  
號南天竺寺五代時號五百羅漢院宋大中祥  
符初改靈山寺天禧四年復天竺寺天聖中僧  
遵式重修有蒼葡萄堂慶元三年改天竺靈隱寺  
三竺之勝周回數十里而巖壑尤美者迴聚茲  
區自飛來峰轉至寺後巖洞玲瓏瑩拔清朗如  
伏虬飛鳳層花索萼皺殼疊浪妍態怪狀不可  
樓陳其林木皆自巖骨擢起蒼翠葱鬱不土而  
茂傳言茲山產玉故腴潤育物如此○張祐詩

西南山最勝一界是諸天上路穿巖竹分流入  
寺泉躡雲丹井畔望月石橋邊洞壑江聲遠樓  
臺海氣連塔明春嶺雪鐘散暮松烟何處去猶  
恨更看峰頂蓮○張仲舉遊寺詩石梁濺水濕  
蒼苔陰洞傍穿澗底回殿閣金銀從地湧山林  
圖畫自天開龍隨僧到分雲住猿認人呼下樹  
來遊興未闌斜日盡馬頭呼酒尚徘徊西湖之  
西天竺深天香滿風多桂林老猿引子下高樹  
流水與雲來遠岑上方已變劫灰黑古洞長帶  
秋嵐陰清輝娛人且歸去後夜月明重來尋○



白廷玉詩山轉龍泓一徑深嵐烟吹潤撲衣巾  
松蘿掩映似無路猿鳥往來如有人講石尚存  
天寶字御梅嘗識建炎春城中遮日空西墜自  
與長安隔兩塵

靈鷲峰即飛來峰之別名也靈隱天竺皆慧理道  
場而桂子天香之景兩寺共之樂天詩所謂兩  
寺元從一寺分一山分作兩山門者是也

月桂峰唐天聖中秋月甚朗降靈實於茲山狀若  
珠璣璀璨奪目有異人識之因曰此月中桂子  
也遂以名峰故宋之間詩云桂子月中落白樂

天詩云宿因月桂落皆謂是耳峰下舊有月桂  
亭慈永拾桂子詩丹桂生瑤實千年會一時偏  
從天竺落祇向月宮知出海光輪滿當軒玉樹  
歌嬋娟含素影凌亂下空墀泉客珠連泣秋荷  
露忽垂林間僧共拾猶誦樂天詩○種桂子詩  
云嫦娥有深意飛下白雲關為惜僊家樹移栽  
佛國山鱗宮人可折鷲嶺世稀攀他日歲寒裏  
杉松相倚閒

稽留峰相傳堯時許由隱居茲山遂名許由峰而  
訛為稽留盧同父詩云問山何以名靈隱山曰



當年隱許由者是也或曰晉時許遠游非許由也然酈道元水經言昔有道士入此不返因以稽留爲山號則稽留之名自漢魏時已然又非許遠游遺蹟矣許遠游名邁自餘杭垂雷山移入靈隱茹芝吟詩有終焉之志嘗與王羲之書曰山陰臨安多金堂玉室瓊芝瑤草漢末得道之士在焉後不知所往人謂羽化云

蓮花峰在山頂孤石可四十圍開瓣若干葉蓮花梅詢詩云巨石如芙蓉天然匪雕飾盤薄峰頂邊嬋娟秋江側涉川試誰採作礪當自惜坐與

榮落同正心未嘗易

三生石在寺後唐時有李源者京洛人父愷死安祿山之難源悲憤不仕不娶居惠林寺者三十年與僧圓澤友善相約遊蜀中峨眉山源欲自荊州泝峽灤欲取長安斜谷路源不可曰吾已絕世事豈可復道京師哉澤默然久之曰行止固不由人遂自荊州路舟次南浦見婦人錦襜負瓮而汲圓澤曰此吾託身之所也源驚問之澤曰婦人姓王氏吾當爲之子孕三歲矣吾不來故不得乳今旣是無可逃者公當以符呪助



我速生三日浴兒時公臨視我以笑爲信後十  
三年中秋月夜當與公相見于杭州天竺寺源  
悲悔爲具沐浴易服至暮澤亡而婦乳三日往  
視之兒見源果笑源遂不果入蜀反居惠林後  
十三年自洛適杭州赴其約所聞葛洪川畔有  
牧童菱髻騎牛歌竹枝隔水呼源覲之乃圓澤  
也歌曰三生石上舊精蒐賞月臨風不要論慚  
愧情人遠相訪此身雖異性常存源問澤公健  
否答曰李公真信士俗緣未盡慎勿相近願勤  
修之又歌曰身前身後事茫茫欲話因緣恐斷  
入烟霞而去

勝吳越山川尋已遍却回烟棹上瞿塘遂拂袖  
翻經臺相傳謝靈運爲兒時翻經于此廬山記云  
謝靈運見遠公而異之以北本涅槃經翻爲南  
本三十二卷遂以名臺則臺當在廬山而茲山  
更見豈後人希謝氏之高踪而托名耶唐姚鉉  
詩康樂悟玄機寂寥此棲息經翻貝葉文臺近  
蓮花石

香林洞一名香桂林舊有香林亭其右爲日月巖  
董嗣杲詩日月巖頭古翠埋錦雲深隔洞門開



蒼藤隨石無根活。靈杞何年有種栽。氣裊野烟  
香疑麝過。煖薰山雨。悞蜂來。空亭誰領幽芬坐。雲  
鶴同行。損綠苔。○黃初庵詩。日射巖扉曉霧開。  
杖藜拄石破蒼苔。一雙蛺蝶隨人去。知是香林  
洞裏來。

葛塢葛井皆稚川遺踪也。相傳吳赤烏二年葛稚  
川得道于此。唐時有方士葛孝僊亦隱茲山。故  
隋郭祥正詩云。二葛旣成僊。猶存煉丹處。是也。梅  
詢詩。僊翁道未泯。棲神在巖石。酌彼山下泉。窮  
年煉丹液。洞陰春始綠。苔甃秋涵碧。緬邈不可

攀。凭欄望鳧鳥。○圓法師詩。僊去遺踪在。泠泠  
翠岳邊。冷光涵碧甃。暗脉瀉寒泉。月映冰壺淺。  
秋澄古鑑圓。羽人居止近。閒汲灌芝田。

神尼舍利塔在靈鷲峰頂。隋仁壽二年遣僧賫神  
尼舍利於此造塔。發土得石坎。因以所賫舍利  
石函納其中。不差分寸。人咸異之。

寺畔舊有七寶普賢閣。日觀庵。西嶺草堂。七葉堂。  
九品觀堂。金光明三昧堂。夜講堂。無量壽閣。慈  
雲懺主榻。旃檀觀音像。瑞光塔。重榮檜。石面靈  
樨。無根藤。水臺盤曲水亭。回車軒。枕流亭。登嘯



亭適安亭清暉亭跳珠軒蓮花水水波石闢鷄  
巖朱壑並廢○七寶普賢閣沙門善照以七寶  
塑普賢菩薩像吏部尚書虞策志其事○日觀  
庵僧遵式建范仲淹爲之記寺中至今相傳有  
文正公臥榻王隨寄詩語傳要妙三乘法香供  
精嚴七祖堂日觀庵中絕塵念彌天高雨靄錢  
唐遵式博習教觀著淨土懺儀天聖中示滅有  
大星隕靈鷲峰塔名瑞光○西嶺草堂唐時道  
標法師立遵式詩昔人枕窮林築室行真道自  
後數百年山邊惟蔓草○七葉堂白樂天詩鬱

鬱復鬱鬱此熱何時畢宜人七葉堂煩暑隨步  
失簷雨稍霏微  
風正蕭瑟清間一覺睡可以  
消百疾○重榮檜在光明懺堂後隋朝所植高  
數丈大十圍後爲兵火所燎至大中祥符間復  
茂○石面靈桃在翻經臺之側生于石面結實  
甚大而甘宋政和間取植上苑○曲水亭一名  
流盃亭亭心有水臺盤曲折可流觴傍有遵式  
所立陸羽二寺記碑薛映詩臺盤䟽石渠激湫  
環四面夏屋有餘清羽觴隨意轉賓告醉言歸  
主稱情未倦雖非禊飲辰豈謝蘭亭讌梅詢詩



鶴髮山中人。疏泉鑿幽石。如憑青玉案。分遞白雲液。泠泠濺雕俎。瑟瑟穿吟席。醉坐三伏中。煩襟自消釋。○回軒亭在曲水亭傍。○枕流亭內有無竭泉。宋高宗嘗臨觀。賜扁。○跳珠軒在客寮中。有泉出石罅。飛洒如珠。蘇子瞻詩。道眼轉丹青。嘗于寂處鳴。早知雨是水。不作兩般聲。○朱野梁時鹽官隱士朱世卿別墅。

又南爲楓木塢。中天竺禪寺。千歲巖。

中天竺寺在稽留峰北。隋開皇十七年僧寶掌建。寶掌以唐高宗顯慶二年住浦江化去。自稱度

世一千七十二年。故茲山中尚有千歲巖。吳越王改崇壽院。政和四年改曰天寧萬壽永祚禪寺。南渡初有摩利支菩薩像。淳熙間建華嚴閣。元天曆間有僧大忻得幸於文宗。改天曆永祚禪寺。其山門中天竺三字。乃國朝魏國公署額。白樂天詩。雜芳潤草合。繁綠巖樹新。山深景候晚。四月有餘春。竹寺過微雨。石徑無纖塵。白衣一居士。方袍四道人。地是佛國土。人非俗交親。城中山下別。相從亦殷勤。○參寥子詩。夕陽山氣靄。葱蔥路轉松陰復。幾重行過石橋人。未



見數聲先聽寺樓鐘。稽留峰北好林泉。珍重幽  
棲得所便。栢子烟中能宴坐。想無餘習可攀緣。  
霜壓簾櫳雪。滋條。銀河初轉斗垂杓。清言共失  
三更夢。錯恨芙蓉漏易消。○王元章送僧歸天  
竺詩。天香閣上風如水。千歲巖前雲似苔。明月  
不期穿樹出。老夫曾此聽猿來。相逢五載無書  
寄。却憶三生有夢回。鄉曲故人憑問信。孤山梅  
樹幾番開。

寺畔舊有天香閣。桂子堂。此中亭。如意泉。興福院。  
多福院。大明寺。永清寺。東岡塔。蘇和墓。並廢。○

天香閣黃潛詩。上方樓閣鬱岩堯。百尺危欄架  
次寥。曾是高人行道處。天香雲外至今飄。○興  
福院淳熙初慧光禪師建。○多福院吳越時建。  
○大明寺法華和尚建。○東岡塔隋法師真觀  
建。○蘇和墓和錢唐人建。閣收書蘇子瞻題曰。  
錢唐書藏卒塋於此。

中天竺之對爲永清塢心庵。○蘇和墓和錢唐人建。閣收書蘇子瞻題曰。  
永清塢之背即爲龍井正德中陳氏建庵塢中名

永清庵

心庵正德間寶珠禪師建有白雲巖王液泉



又西南過肅儀亭見心亭爲上天竺講寺乳竇峰獅子峰雙桂峰白雲峰天香巖夢泉大悲泉如意池肅儀亭宋嘉祐中僧元淨建元淨字無像於潛入中天受戒於天竺慈雲師學行精進神宗嘉之錫號辨才居上天竺十七年與蘇子瞻昆季趙閱道友善頃之還於潛復歸天竺遷居龍井子瞻贈之詩云道人出山去山色如苑灰白雲不解咲青松有餘哀忽聞道人歸鳥悅山容開神光出寶髻法雨洗浮埃想見南北山花發前後臺寄聲問道入借禪以爲恢何所聞而去何所見而

回道人笑不答此意安在哉昔年本不住今者亦無來此語竟非是且食白楊梅趙閱道贊云師去天竺山空鬼哭天竺師歸道場光輝大士大悲實師焉依師乎真乎真金琉璃教宗智者法嗣韶師須彌有壞至道無爲稽首慈相仰之讚之皆無妙幻豈勝言思亭久廢皇朝洪武二十八年僧一如重建一如者會稽人善講法華經少師姚廣孝嘗語人曰如公兩浙一人也永樂間修大藏經詔一如總其事寵賚甚渥卒葬天竺山少傅楊士奇爲之志



見心亭嘉靖十三年都指揮僉事李節建其西有  
梅峰庵今廢

上天竺寺晉天福間僧道翊結庵山中一夕見瑞  
光發於前澗就視之得奇木刻畫觀音大士像  
後漢乾祐間有僧從勲自洛陽持古佛舍利來  
置頂中妙相咸備書放白光士民崇信吳越王  
嘗夢白衣人求緝其居寤而有感遂建天竺觀  
音看經院宋咸平中浙西久旱郡守張去華率  
僚屬具幡蓋鼓吹迎觀音而禱霽雨濡足自是  
有禱輒應蘇子瞻雨中遊觀音院詩云蠶欲老

兮麥欲黃山前山後雨浪浪農夫輒耒女停筐  
白衣僊人坐高堂蓋有聖於祈晴也南渡時捨  
施珍寶有日月珠鬼谷珠猫睛等雖大內亦以  
爲罕見嘉祐中沈文通治郡謂觀音以聲音宣  
佛力非禪那所居乃以教易禪命僧辨才元淨  
主之鑿山築室幾至萬礎治平中郡守蔡襄奏  
賜靈感觀音殿額元淨乃益鑿前山闢地二十  
有五尋殿加重簷建炎四年元木入臨安高宗  
遜于海元木謁天竺問知觀音本始乃奉之輿  
中與太藏經併徙而北時有比丘智完者率其



徒以從至燕舍於都城之西南五里曰玉河鄉  
建寺以奉天竺之僧乃重以他木刻肖前像詭  
曰藏之井中而出之至今稱觀音出現井其實  
非故物也乾道三年建十六觀堂七年改院爲  
寺門扁皆御書慶元三年改天台教寺元至元  
三年燬五年僧慶思重建仍改天竺教寺元末  
燬國初重建累朝代有宣賜金帛及寶幡  
之屬寺內有白雲堂兩峰堂中印堂雲漢閣應  
真閣延桂閣秋芳閣伴雲閣清華軒植杖亭謝  
履亭流虹澗金佛橋琮老橋凝翠泉觀音泉雲

液池池上有辨才手植山茶花並廢唯白雲堂  
尚存○宋孝宗觀音像贊荷歟大士本自圓通  
示言有說爲世之宗明環無二等觀以熙隨感  
卽應妙不可思○理宗觀音像贊神通至妙兮  
隱顯莫測功德無邊兮感應甚速時和歲豐兮  
祐我生民兵寢刑措兮康此王國○李太白與  
從姪良遊天竺寺詩挂席凌蓬丘觀濤憇樟樓  
三山動逸興五馬同遨遊天竺森在眼松風颯  
驚秋覽雲測變化弄水窮清幽疊嶂隔遙響當  
軒寫歸流轉成傲雲月佳趣滿吳洲○蘇子瞻



秋日龍井訪辯才詩不辭清曉叩松扉却值支  
公久不歸山鳥不鳴天欲雪捲簾惟見白雲飛  
乳竇峰在天竺寺南下有空巖懸乳如脂甘和可  
啗其西爲獅子峰雙桂峰一曰雙桂巖其北爲  
白雲峰其東爲天香巖烏石峰稍南爲中印峰  
重岡疊巘蒼翠輝映又西爲蛾眉山  
夢泉宋崇寧元年浙西大旱寺中厨水不給主僧  
王法師夢泉發于西坡鑿之果得遂名夢泉  
大悲泉在講堂下流遶殿前經如意池池以青石  
爲之方丈面鑿如意文曲折回遶可流觴焉

出寺折而東南爲幽淙嶺捫壁嶺活沙塢再上爲天  
門

幽淙嶺俗稱水出嶺病其不雅易以今名深壑冷  
泠巉石齒齒陟此者必布襪芒屨前後牽挽三  
步一踴五步一躄草樹四周仰天一線至捫壁  
嶺則左迫峭嶂右臨深溪緣木扳蘿方可舉趾  
活沙者流沙也滑而善崩上至天門則諸山下  
伏雙峰錐立西湖鏡開遊覽至此譬諸洞開武  
庫珍寶橫陳無復底蘊從此而東則爲龍井又  
高爲郎當嶺小青嶺大青嶺升降相因西湖或



隱或見又南則為五雲山矣

西湖遊覽志第十一 卷終

西湖遊覽志第十二卷

錢唐田汝成輯撰

南山城內勝蹟

吳山

吳山春秋時為吳南界以別于越故曰吳山或曰以伍子胥故訛伍為吳故郡志亦稱胥山在鎮海樓之右蓋天目為杭州諸山之宗翔舞而東結局于鳳皇山其支山左折遂為吳山派分西北為寶月為蛾眉為竹園稍南為石佛為七寶為金地為瑞石為寶蓮為清平摠曰吳山奇巖



危峰澄湖靚壑江介海門回環拱固扶輿淑麗  
之氣鍾焉是以邑居叢集華艷工巧殆十萬餘  
家聲甲寰宇恢然一大都會也其陟山之徑有  
門曰登高覽勝石磴斗折可數百級許元時平  
章谷刺罕脫歡所甃也立而環眺則官司廨署  
與衛鎮崇巖闐闐街衢紅塵霧起市聲隱賑漏盡  
與山猶喧道院僧廬晨鐘暮鼓青樓畫閣雜以笙歌  
升其巔則縹緲凌虛碧天四匝山川包界脉絡  
縷分或昂而爲首或穹而爲脊或掉而爲尾若  
亂若聯運掌可數楊仲弘同平章巖巖子山吳

山晚眺詩山椒暈構四垂宵上相旌旗會覽觀  
旁近江湖天廣大上連星斗界清寒龍宮永鎖  
函書闕鳳嶺重嗟苑樹殘此際獨無雲蔽日正  
宜翹首望長安○薩天錫錢唐驛樓望吳山詩  
仙居時復與僧隣簾幙人家紫翠分後嶺樓臺  
前嶺接上方鐘鼓下方聞市聲到海迷紅霧花  
氣漲天成綵雲一代繁華如昨日御街燈火月  
紛紛

忠清廟東嶽中興觀玉樞道院至德觀惠應廟承天  
靈應廟



忠清廟以祀吳行人伍員者員字子胥楚大夫奢之子平王以讒殺奢子胥奔吳說吳王闔閭伐楚以報父仇吳遂以伯入越棲越王勾踐于會稽越使行成子胥諫不聽卒赦越頃之吳伐齊越率其衆而朝吳子胥諫曰是秦吳也不如早從事焉又不聽賜之屬鏹以死浮尸江中吳人憐之立祠江上因命曰胥山廟唐景福二年封廣惠侯宋大中祥符間賜額曰忠清封英烈王紹興三十年改忠壯嘉熙間海潮大溢彌望七十八里隕爲洪流京兆趙與權禱于神水患頓

息乃奏建英衛閣于廟中元末燬國初重建正統十四年重修每歲以九月二十日致祭唐盧元輔胥山銘序略云有吳行人伍公子胥陪吳之職得死直言千五百年廟貌不改漢史遷曰胥山今云青山者謬也伍公絕楚出疆在平爲未宦臣在奢爲旣壯子坎壈伏節乞師于吳五戰至郢先王有言撫則后虐則仇成湯用爲大義孔子立爲大經子胥修爲大仇騷人賤爲大怨則前戈鞭墓非倒行也後戈走昭非逆施也夫差旣王宰嚭受賂太伯廟血將乾公朝焉



西漢書卷之三  
宴馬入則諫焉屬鏤之賜竟及其身鳴夷盛屍  
投于水濱憤悱鼓怒配濤作神迄今一日再至  
海鷗羣飛陽侯夾從仲秋關壑杭人以旗鼓逐  
之百城聚觀大耀威靈蕩漭千里洪波砥平有  
滑有脂有鹹有醒遙實乎下庭山海梯航鷄林  
扶桑交臂乎卯階金狄在戶雷鼓在堂魏罇漢  
豆六代笙簧可謂奉天爵之馨香獲人神之盛  
禮佐皇震怒驅叱大邪萬里永清人觀斗氣銘  
曰武王鉞紂子胥鞭平爲人爲父十死一生矯  
矯伍員執弓挾矢杖其寶劍以謁吳子稽首楚

罪皆中紂理蒸報子妻羸鉏直士赫赫王閔賈  
聽竒謨錫之金鼓以彌以誅黃旗大舉右廣旆  
朱戮墓非赭瞻昭乃烏後王嗣立執書不泣顛  
越言潤宰嚭讒輯步光欲飛姑蘇待執吾則切  
諫抉眼不入投于江上自統波濤晝夜兩至懷  
沙類騷洗滌南北簞蕩東西夷蠻卉服罔敢不  
來雖非命祀不讓瀆濟帝帝王代代明明表  
我忠哉○王介甫廟記銘曰烈烈子胥發節窮  
逋遂爲策臣奮不圖軀諫合謀行隆隆之吳厥  
發不遂邑都俄墟以智死昏忠則有餘胥山之



顛殿屋渠渠千載之祠如祠之初孰作新之民  
勸而趨維忠肆懷維孝肆孚我銘祠庭示后不  
誣○宋王儼詩朝驅下越坂夕飯當吳門停車  
訪古跡靄靄林烟昏青山海上來勢若游龍奔  
星臨牛斗域氣與東南吞九折排怒濤吐吸天  
地根落日見海色長風捲浮雲山椒戴遺祠興  
廢今猶存殘香吊木客倒樹哀清猿我來久沉  
抱重此英烈魂吁嗟屬鏤鋒置爾國士冤峨峨  
姑蘇臺榛棘曉露繁深居麋鹿游此事誰能論  
因之毛髮豎落葉秋紛紛○高季迪詩地老天

荒伯業空曾于青史見遺功屍鞭楚墓生前孝  
快目吳門死後忠魂壓怒濤翻白浪劍埋冤血  
起腥風我來無限傷心事盡在越山烟雨中  
東嶽中興觀宋大觀中建東嶽行祠理宗書東嶽  
之殿以賜道士陳壽文謝表云琳館肇新位定  
東方之震宸奎寵錫光照南面之離道日晉明  
宗風益振臣惶懼頓首竊以泰山之主實為方  
嶽之宗春此神臯首從祀典海山歸會坐令江  
漢之朝宗火木相生有末邦家之正氣當奎婁  
之躔坎控青代之要衝鬱然膚寸之雲徧作崇



朝之雨。權既尊于管攝。向富取于發生。臣壽文浪跡江湖。猥司香火。甫鳩工之有日。忽渙彌之自天。畫燦龍章。增重湖山之勝。墨香鳳翥。於昭雲漢之光。聳三極之具瞻。翕萬靈之拱護。齊休宗社。永鎮乾坤。茲蓋恭遇陛下。既聖多猷。清心寡慾。仁恩溥博。撫先王必世之時。厚德施生。致大道無爲之化。兵鋒偃息。民俗阜安。瑞露凝甘。景風吹煖。際此清閒之宴。游茲翰墨之林。遂致微臣亦從所禱。臣應對灑掃。仰瞻御畫之星垂。曉夕焚脩。願祝皇圖之嶽固。表入帝嘉之元季。

燬 皇明景泰間重建。成化十年大火。忠清海會諸廟宇悉燬。觀亦延燼。嘉靖十一年道士徐志源重建。侍郎江曉爲之記。觀側有聖母池。圍以石欄。今廢。

王樞道院俗稱神霄雷院。天順六年道士吳志中建。

至德觀在宋渾儀臺側。十一曜太歲堂也。紹興間建。端平三年理宗書額曰至德之觀。元至正燬。渾儀無存。行省丞相達識帖木兒重建。構星宿閣。塑三天帝真五星九曜周天星宿后土神殺。



之像今俗第稱星宿閣而諸像泯矣元末燬天  
順六年道士吳志中重建成化甲午大火諸廟  
皆焚而茲觀無恙每歲迎春奉勾芒之神于此  
觀側宋有太史局置神御殿以奉昊天上帝皇地  
祗太祖太宗高宗寧宗理宗之神測驗渾儀所  
臺上有渾儀下有土圭天順六年道士吳志中  
惠應廟俗呼皮場廟相傳有神張森相州湯陰人  
縣故有皮場鎮萃河北皮鞞蒸潰產蠍螫人輒  
死神時爲場庫吏素謹事神農氏禱神殺蠍鎮  
民德之遂立祠凡疹疾瘡瘍有禱輒應漢建武

間守臣以聞遂崇奉之傍邑皆立廟宋時建廟  
于汴京顯仁坊建炎南渡有商立者携神像至  
杭州舍于吳山看江亭因以爲廟額曰惠應咸  
淳德佑累封王爵兩廡繪二十四仙醫相傳佐  
神農氏採藥者也當宋時頗著靈異有處州葉  
生奉神甚虔下第不能歸謂同舍曰明當禱皮  
場乞錢三萬衆皆哂之及還曰神許我矣明日  
薄暮有近郡太守以三萬招館客衆以失意不  
欲往葉亟往自獻得錢符昨數瀕行須一力荷  
擔又往禱之喜曰神許我矣既裝束杳然無人



乃令齋僕齋行。同舍曰：此僅可抵江下，柰渡江何？葉生日：吾所恃惟神，他非所慮也。長揖徑出。至午，齋僕回舍云：葉上舍登舟時，一鄉夫自江西來，云與隣居，欣然隨去矣。眾皆異之。數日同舍生自越州回，乃與葉生同舟者。云是日中流風作，檣仆，舟中人驚怖欲死，而葉生熟睡，齁齁也。俄而風正，檣起，舟人言危時見金甲巨人伏劍坐篷上，葉生竦然曰：此吾所奉皮場大王也。啓筭出繪圖，舟人驚服。

承天靈應廟，舊為天地水府三官堂，故俗稱三官廟。宋龍德三年建，名王虛觀。紹興四年，改冲天觀，尋燬。端平三年重建，改賜今額。有天開圖畫閣、清暉亭。元末燬。洪武二十三年，道士嚴一清重建。弘治七年，道士沈玄理、章德芳相繼修之。元吳訥登吳山，留題承天觀詩：滿目盡樓臺，路從山頂來。潮生沙岬沒，雲破海門開。官舍籠鵝去，道人騎鶴回。題詩向何處，石壁掃蒼苔。○東軒詩：孤客憑危正惘然，江南春盡落花天。海門黑送千艘雨，城郭青炊萬竈烟。燒藥金爐猶伏火，射潮鐵箭久離絃。伍員白馬今何在，幾處荒



臺野鹿眠。○宿承天觀用楊庶夫韻詩承天觀裏開圖畫。吳越山河一覽中。半夜月明湖水白。五更日出海門紅。綵船春晚笙歌歇。粉堞風高鼓角雄。十二闌干都倚遍。歸心飛過大江東。○劉伯溫承天觀詩吳山頂上承天觀。玉牒金符鎮地靈。百尺樓臺依斗極。九霄風露出窻櫺。江聲洶湧蛟龍闕。雲氣虛無翡翠屏。見說蓬萊恰相對。仙凡只在隔滄溟。○張伯雨清暉亭詩萬瓦連雲人世窄。一鷄啼日海波紅。欲窺倒影青冥外。故着危亭紫翠中。

### 石佛山海會寺

石佛西聯寶山南面瑞石舊有大乘石佛寺宋嘉熙間僧鑿石為三佛元至正間河西僧朶羅只募緣莊嚴建寺居之改名智果院

海會寺吳越王建舊名石佛智果院宋大中祥符間改名積善海會寺嘉泰間燬至正間重建平章夔夔子山書大海會寺額御史大夫慶童書觀音寶殿額成化十年火踰年僧浩中重建其下有康張廟以奉威濟善利孚應昭烈康元帥東平忠靖洪濟景祐張元帥



寶山百法寺寶奎寺玄妙觀施公祠忠節祠真聖觀  
晉光庵

寶山東接石佛山蘇子瞻同秦仲二子遊寶山詩  
平明已報百吏散。半日來陪二子閒。立鶴低昂  
烟雨裏。行人出沒樹林間。○寶山新徑詩藤梢  
橘刺元無路。竹杖棕鞋不用扶。風自遠來聞咲  
語。水分流處見江湖。回觀佛國青螺髻。遍踏仙  
人碧玉壺。野客歸時山月上。棠梨葉戰暝禽呼。  
百法寺在石龜巷宋建炎初僧寶寧建有大佛半  
身依山鑿石爲之淳熙十四年賜額廣潤元時

改額百法趙子昂書元末燬 皇明天順元年  
僧道冲重建

寶奎寺在寶山頂宋丞相喬行簡故第奇石峭拔  
東望海門如在咫尺紹定間理宗幸其第書見  
滄二字賜之勒之厓石遂舍宅爲寺以寶奎請  
額詔從之元季燬 皇明弘治間重建尚書洪  
鐘爲之記郡人茅瓚讀書寺中嘉靖十七年狀  
元及策因號見滄而作亭覆石上

玄妙觀在石龜巷唐末爲紫極宮梁開平二年改  
真聖觀宋天禧中郡守王欽若奏徙天慶觀額



于此理宗書天慶之觀以賜內有真宗賜王欽  
若詩高宗書道德經石刻元時改玄妙觀尋燬  
洪武間有陳四者佃其西之半陳無子捨道士  
俞復中重拓之觀始復舊後有石洞幽雅陰寒  
夏遊最快先是觀中有蕉花一株以盛衰卜休  
咎方玄妙改額時蕉花盛開有趙道士居之一  
日羽客來訪趙適他出客題詩蕉葉云午夜君  
寶山玩月回西隣小圃碧蓮開天風香霧蒼華冷  
名籍因由問汝來又曰白雪紅鉛立聖胎美金  
花要十分開好同子往瀛洲看雲在青霄鶴未

來識者以爲呂洞賓也自是士夫題詠甚多今  
摘其著張翥詩遠別仙人黃石翁一龕煙火領  
祠宮青衣洞僻荒苔雨白馬山寒古木風金鼎  
空歌聲渺渺蒲團宴坐息濛濛不知巖客重來  
否零落蕉花石沼中○吳全節詩搯皮書壁走  
龍蛇池上芭蕉又見花北關恩承新雨露西湖  
光動舊烟霞春風日長玄都樹秋水星回碧漢  
槎脩月功成三萬戶葉珠宮裏誦南華○吳伯  
尚詩吳山宮闕碧巖從歸去還棲第幾峰身上  
衣如華表鶴手中節是葛陂龍題詩嘗見仙人



過採藥惟應海客逢。聞有著書藏石室。何年爲  
 啓白雲封。○歐陽玄詩。羽衣紫捧紫芝泥。除道  
 松關驛馬嘶。水國蜚符驅海鱷。雲房解榻聽天  
 鷄。月中桂子吹香送。池上蕉花與屋齊。珍重穀  
 城黃石老。輕身許我躡丹梯。○葉明誠詩。黃石  
 山人白玉冠。手持千歲青琅玕。吐吞日月脩內  
 景。呼吸風雨來雲壇。蕉池春漲烟霧濕。松几仙  
 筆蛟龍盤。天香滿袖騎鶴去。鷄犬夜夜聞雲端。  
 ○揭傒斯詩。誰道錢唐非昔日。神宮仙館參差  
 出。天慶已開玄妙門。桃花猶結千年實。仙人巖

客題詩處。道士著經會姓。禡舊人雖有馬先生。  
 年幾一百猶童孺。永昌門外浙江潮。趁潮暮暮  
 復朝朝。仙人一去不可招。蓮萊願往那能橋。鍊  
 師歸領祠宮事。淨洗塵心養真氣。滿城煨燼猶  
 哭聲。空有吳山千丈翠。

施公祠在石龜巷口。其神曰施全。宋殿司小校也。  
 紹興二十年二月。全憤秦檜奸邪誤國。俟其入  
 朝。懷刃刺之。不免被執。檜罵曰。汝病心耶。全曰。  
 丞相病心耳。通虜欺君。戕剝忠義。非病心。何以  
 有此。檜大怒。命磔于市。郡人且哀且憤。詎曰。此



西河志卷之十一  
不了事漢也。相與立祠祀之。歷元季燬。國朝  
天順間重建。

忠節祠 皇明嘉靖十六年御史周汝員等建以  
祀吳行人伍公員唐傑射褚公遂良宋少保岳  
公飛明太傅于公謙者事見各祠墓紀中先是  
弘治十年御史姚壽建忠節坊爲亭貯碑以記  
其事歲久亭圯至是建祠而御史傅鳳翔定以  
每歲八月十五日致祭

真聖觀後唐乾符間建吳越王改兩浙老君廟元  
季燬 皇明正統九年重建

普光庵在忠節祠北元元統間丞相莫華捨地僧  
法藏建有玉壺池吳坡泉

七寶山通玄觀七寶庵定水寺開寶仁王寺

七寶山在宋天慶觀後今白馬廟巷之西舊有寶  
嚴院廣嚴院櫻桃園並廢○寶嚴院唐清泰二  
年錢氏建名瑞隆宋治平二年改今額有垂雲  
亭借竹軒秦少游曾宿軒中夢天女以維摩像  
求贊淳祐間建佛閣理宗書無量福海四字扁  
之蘇子瞻佐郡時有雲閣黎者寓院中閉戶十  
五年謝絕人事日禮觀音經忽一日雷偈端逝



偈云誦經一字。禮一拜。頭白眸眇坐塵界。天鷄  
臨夢啼一聲。明月一輪觀自在。子瞻吊之詩云。  
雲師來寶山。一住十五秋。讀書常閉戶。客至不  
舉頭。去年造其室。清坐忘百憂。我初無言說。師  
亦無對酬。今來復扣戶。空房但颯颯。云已滅無  
餘。薪盡火不畱。却疑此室中。常有斯人否。所遇  
孰非夢。事過吾何求。○廣嚴院吳越王清泰元  
年建。本名瑞慶。宋治平二年改額。其時有雙竹  
甚奇。透枯樹腹中。自其頂出。森然並竦。司馬文  
正公賦詩云。雙幹格枯腹青青。兀幾霜龍騰。雙  
角直鯨噴。兩鬚長。既欲尋支遁。安能問辟疆。屢  
來非別意。未與此君忘。南渡後分院。基之半爲  
御厨。營景定初重建。○櫻桃園宋時採含桃以  
薦太廟者。

通玄觀紹興二十九年内侍劉敖入道。修真結庵  
于此。高宗御書通玄二字榜之。賜名能真。內有  
壽域樓。萬玉軒。壘鶴亭。謁斗壇。白鶴泉。鹿泉。  
皇明嘉靖間法師徐道彰重修。其徒郁存方。修  
志存方。禱雨祈晴。往往靈驗。觀中脩竹蔭庭。赤  
日無暑。虞伯生詩。仙壇遙接上真宮。楚越閩洋



一壘中南北高峰雲杳靄東西天日雨溟濛金  
輪旋動仙音作樓閣縈迴複道通雲鶴仙人無  
定跡颺輪時轉壘三峰○張翥詩羽蓋翩翩下  
九重江鄉秋晚滯仙蹤信傳真府憑青鳥劍舞  
瑤臺走碧龍頃刻風雲興五嶽須臾雨澤慰三  
農慇懃欲問叅同契雙鳥遙飛未易從

七寶庵元延祐間道士玄谷建至正間貝一默重  
修

定水寺宋乾道八年建于萬松嶺嘉定八年移清  
波門外元至元十三年築城徙七寶山

開寶仁王寺宋汴京開寶寺有仁王院高宗南渡  
僧慧照隨駕卓錫于此遂建寺如汴京紹熙二  
年賜額景定五年燬 皇明景泰間重建尚書  
孫原貞記薩天錫登橫山閣詩千尺青蓮座烟  
霞擁地靈山川幾兩屐日月兩浮萍鳥度天垂  
海龍歸水在瓶深堂說法處應有石頭聽

三茅寧壽觀雲居聖水寺

三茅寧壽觀在七寶山東北本三茅堂相傳三茅  
君長盈次固季衰秦初咸陽人得道成仙自漢  
以來崇祀之宋紹興二十年因東京舊名賜額



日寧壽觀并昇古器其一漢鼎高尺有九寸廣尺兩耳旁出曲上三尺牛首識云有漢建元三年八月作牛鼎祀太室銘曰惟甲午丙寅帝若稽古肇作宋器審厥象作牛鼎格于位室從用饗億寧神休惟帝時保萬世其永賴其一唐鐘識云丙辰九月二十四日常州澄清觀女冠王玉仙作河東薛泚爲之銘曰上德願而鑄洪鐘仙聖依而人天從霜朝聞兮窈窕月夜聽而春容蓮花生而腰淨頂銜繞于盤龍響上徹于天閣外聲下徹于九重庶長空于鬼獄魔屏跡而潛

踪其後忽失所在紹興間有鐘震于太湖濱湖緇黃競舟迎之獨澄清觀舟至凌波而上一引出之視之乃本觀唐時物也守臣以獻賜之觀中聲徹雲表孝宗朝出金帛度牒易之置禁中洪武七年三月錢唐知縣朱復以廢銅鎔之其一褚遂良小楷陰符經景定庚申理宗以賈似道有江漢功賜金帛百鉅萬不受詔就觀取陰符經酬之觀燬于元至元辛巳洪武初重建成化十年建昊天寶閣棟宇翬飛金碧騰煥環盼江湖渺歸睫底王元章詩層巒開逕隱空青勃



西清志卷之三  
三  
宰槃跚眼力生蘿磴曉風畱宿雨石林寒竹動  
秋聲城隍下瞰紅塵海樓閣高標白玉京夜靜  
何人吹鳳管碧桃千樹月華明○薩天錫詩楊  
子江頭春水漲三茅觀裏碧桃開道人不問天  
南北夜半月高騎鶴來

雲居聖水本二寺也雲居庵者宋元祐間僧了元  
建聖水寺者元元貞間僧明本建明本立約其  
徒不置恒產惟資化緣爲僧家風味至大間沙  
門指月拓基廣之掘地四尋得管井甃甃堅好  
中有佛首三枚諸相具足遂塗金事之名曰三

佛泉巴西鄧文原爲之銘曰我觀大地積水所  
載孰䟽鑿是太虛無外掘地及泉視之縈帶如  
履冥塗破諸障礙其源淵谷其瀉湍瀨不止不  
流以與井會瑞相見前示我三昧彼壞者石實  
相不壞是實相故遍恒沙界以一勺甘除世渴  
愛是相是水無在不在我作銘詩以警盲聵洪  
武二十四年併聖水于雲居賜額曰雲居聖水  
禪寺內有聽松軒了元彌佛印善詠諧以禪爲  
戲明本彌中峰又彌幻住博涉經史洞徹法源  
爲文操筆立就祝髮時有故宋宮人楊妙錫者



以香盒貯髮舍利叢生遂建塔寺中久廢成化  
間僧文紳修復有小像一幅神氣如生相傳爲  
中峰自寫上有贊云幻人無此相此相非幻人  
若喚作中峰鏡面添埃塵○張仲舉秋日遊聖  
水寺詩高處見滄溟西風吹酒醒潮來一片白  
山擁萬重青草木如浮動烟塵忽杳冥登臨不  
可極吟思滿秋汀○夏原吉詩誰闢雲居境峨  
峨瞰古城西湖晴送碧上竺晚分青經鎖千函  
妙鐘鳴萬戶聲此中真可樂何必訪蓬瀛

金地山城隍廟梓潼帝君廟火德星君廟

金地山舊有妙果尼寺今廢

城隍廟本已前在鳳皇山舊名永固紹興九年徙  
建於此宋初封其神爲保順通惠侯咸淳間加  
輔正康濟廣德顯聖王元時繪神之夫人子孫  
像于後寢洪武元年詔天下各府州縣城隍之  
神止稱本號前代封稱咸革并去其像茲廟正  
神已易木主寢殿繪像猶存宣德間御史吳濬  
奉詔毀之

梓潼帝君廟俗稱文昌祠神初祀于蜀唐玄宗  
蜀封神左丞相宋元祐三年加封輔元開化文



昌司祿帝君嘉熙間蜀破民多徙錢唐而蜀人  
牟子才等遂請立廟于吳山其傍立二童俗稱  
天龔地啞者是也方神在蜀時吳曦將叛前事  
之數月神思昏擾夜數躍起寢中叱咤四顧或  
終夕不得寢意頗悔欲但已其弟晁力懲懣之  
曰是謂騎虎顧可中道下耶曦家素事梓潼自  
璘玠以來有禱輒驗乃齋而請是夕夢神坐堂  
上已被赭玉謁焉因告以逆且祈十年之修永  
神不荅第曰蜀土已悉付安丙矣又曰安丙才  
足辦此既寢大喜蓋丙判隆慶府曦僞授丞相

長史託以腹心丙陽順而陰圖之結楊巨源李  
好義等勒兵誅曦其他靈驗不可縷數元末燬  
國初重建徐一夔作疏云文昌祠在蜀之潼  
川實司科舉之事宋南渡後有祠在吳山之巔  
火蓋蜀士赴舉者所創也自經兵變頽圮弗治聖  
朝更化首詔科舉取士乃者賓興而浙司得人  
爲盛此皆神明陰佑斯文所致而揭虔妥靈之  
地弗致崇嚴庸非斯文之耻乎用持短疏徧咨  
同志之士共脩葺之伏以英靈發現肇迹遠在  
東川神氣流通降祥乃及西浙屬文運方興之



日應國家急材之需。相我士於棘闈。悉登名于桂籍。嵯峨遺廟。尚左江而右湖。寂寞神棲。乃傍穿而上漏。既蒙陰騭之賜。敢忘昭報之忱。爰務重修。有干同志。白驪數至。定驚棟宇。鵬飛黃榜。多賢共賀。人材輩出。尚資靈貺。助我皇家。火德星君廟。大火爲宋分野。宋以火德。王故南渡。後建廟于此。以奉熒惑之神。洪武中。布政使王鈍。永樂中。叅政易景。相繼重建。今郡人禳火者。皆就廟中。蓋遺俗也。

瑞石山橐駝峰雪風洞瑞石泉紫陽庵

瑞石山秀石玲瓏。巖竇竄窳。寒泉涓瀝。匯爲澄泓者。徃徃而有。清幽徹骨。空翠撲肌。湖山奧區。罕與倫比。橐駝峰峭削凌空。雪風洞豁開曲徑。履鳥所涉。栩栩然。覺有仙風焉。陸天錫詩云。天風吹我登駝峰。大山小山石玲瓏。赤霞日射紫瑪瑙。白露夜滴青芙蓉。飄飄雲氣穿石屋。石上涼風吹紫竹。掛冠何日懸歸來。煮石篝燈洞中宿。紫陽庵。宋嘉定間。邑人胡傑居此。建集慶堂。元至元間。道士徐洞陽得之。改爲紫陽庵。其徒丁野鶴棄俗全真。一日召其妻。王守素入山。付偈云。



嫩散二字不見  
係樞密心而見  
十年守生受用  
無窮

嫩散六十年。妙用無人識。順逆兩俱忘。虛空鎮  
長寂。抱膝而逝。守素遂奉其屍而漆之。端坐如  
生。亦束髮為女冠。不下山者二十年。薩天錫贈  
之詩云。不見遼東丁令威。舊游城郭昔人非。鏡  
中人去青鸞老。華表山空白鶴歸。石竹淚乾班  
雨在。玉簫聲斷綵雲飛。洞門花落無人到。獨坐  
蒼苔補道衣。其庵久廢。皇明正統甲子。道士  
范應虛重建。作玉虛墜江二樓。聶大年為之記。  
瑞石山之左。宋有太廟。紹興四年建。正殿七楹。為  
柘室十有四。以奉太祖太宗真宗仁宗英宗神

宗哲宗徽宗其後益以高宗孝宗光宗寧宗理  
宗凡十二。二王欽宗則缺而不祀。設七祀位于殿  
下。橫街之北。以祀司命戶竈中雷門厲行。設配  
享功臣位于橫街之南。太祖則趙普曹彬太宗  
則薛居正石熙載潘美真宗則李沆王旦李繼  
隆仁宗則王曾呂夷簡曹瑋英宗則韓琦曾公  
亮神宗則富弼哲宗則司馬光徽宗則韓忠彥  
高宗則呂頤浩趙鼎韓世忠張俊孝宗則陳康伯  
史浩光宗則葛郊寧宗則趙汝愚  
寶蓮山青衣洞青衣泉重陽庵寶成寺



寶蓮山與七寶山相連。舊有寶蓮寺。宋嘉定間。楊節使廢而爲園。徙寺于豐豫門外。

青衣洞相傳昔有人至洞口。見青衣童子姣好如玉。訊之不應。逐之不見。但聞洞中風雨之聲。股弁而出。遂名青衣洞。洪武中。常德丁啓東至杭州。夢羽人携一童子詣啓東云。以此子爲君之子。問所從來。則云青衣洞。翌旦往青衣洞訪之。見有童子塑像儼然。昨所夢也。踰年生子曰潤山。啓東爲之建亭覆泉上。宣德中。潤山以賢良舉爲閩縣主簿。道杭州爲之建殿宇。

青衣泉浙浙出石罅。清鑿毛髮。嵯岬鑄有唐開成五年。南嶽道士邢令聞。錢唐縣令錢華。道士諸葛鑑。八分書題名。傍鑄佛像及大字心經。山頂巨石墜下有石承之。若鉅釘。然前有石門。上橫石梁。壁間皆細字水波文。不知何年。泮水至此。宋慶元間。韓侂胄賜第寶蓮山下。建閣古堂。砌瑪瑙石爲池。引泉注之。名閣古泉。陸務觀記云。韓府之西。繚山而上。五步一磴。十步一壑。嵯如伏龜。徑如驚蛇。大石礧礧。或如地踊以立。或如空翔而下。或翩如將奮。或森如欲搏。名葩碩果。



更出互見。壽藤恠甚。羅絡蒙密。地多桂竹。秋而華敷。夏而籜解。至者應接不暇。左顧右盼。則呀然而江橫陳。豁然而湖自獻。天造地設。非人力所能爲者。其尤勝絕之地。曰閱古泉。在潛水亭之西。繚以翠麓。覆以美蔭。又以其東向故。浴江之曰。既望之月。泉輒先得之。袤三尺。深不知其幾也。霖雨不溢。久旱不涸。其甘飴蜜。其寒冰雪。泓止明清。可鑿鬚髮。而游塵墜葉。常若有神物呵護。屏除於朝暮。雨暘無時不鏡如也。泉上有亭。文中置瓢。飲可濯。尤于烹茗釀酒爲宜。他

名泉皆莫逮。公常與客徜徉泉上。酌以飲客。時游年最老。獨盡一瓢。公顧而喜曰。君爲我記此亭。使後知吾輩之游。亦一勝也。游按泉之石壁。有唐開元五年道士諸葛鑑八分書題名。蓋此泉湮伏弗耀者。幾四百年。公乃復發之。而閱古。蓋先忠獻王以名堂者。則泉可謂遇矣。游于告老之後。視道士爲有愧。其視泉尤有愧也。幸且暮得復歸山。幅巾短褐。從公一酌此泉。而行尚能賡之。

寶成寺。晉天福中建。名釋迦院。宋大中祥符間改。



額寶成寺有石觀音羅漢像壁間有蘇子瞻寶  
成院賞牡丹詩春風小院却來時。壁間惟見使  
君詩。應問使君何處去。憑君說與春風知。年年  
歲歲何窮已。花似去年人老矣。去年崔護若重  
來。前度劉郎在千里。詩鐫石壁筆法甚道其旁  
有歲寒松竹四字乃成化間吳東升題者。閱古  
清平山開元寺

清平山在仁孝坊舊有烟霞閣四壁畫古賢像多  
名人題詠今廢巷內有郭兒井。曰。此井亦古也。  
開元寺唐玄宗時建宋建炎間徙建于西湖元季

兵燹復徙故址 皇明正統五年禮部尚書胡  
溪記劉士亨贈寧和尚詩清平山下古叢林王  
席知師道行深菩薩每分香積飯伽藍常護給  
孤金誦餘千偈燈生暈坐斷諸綠樹轉陰愧我  
未能修淨業塵勞空役利名心

寶月山蛾眉山淺山竹園山

寶月山在布政司對舊有寶月寺上有黑龍潭深  
窈如井

蛾眉山在寶月山西有八眼井  
一和國城而古  
淺山有漾沙坑紫坊嶺宋有七官宅楊后宅大佛



寺後改爲糧料院

竹園山在今府治之西南吳山一脈獨趨而北隱

隱隆起宋安撫趙與篤建閣其上平鑑西湖扁

實曰竹山閣

實曰竹山閣

實曰竹山閣

實曰竹山閣

實曰竹山閣

實曰竹山閣

西湖遊覽志第十二卷終

西湖遊覽志第十三卷

錢唐田汝成輯撰

南山分脈城內勝蹟

城闌

鳳山門候潮門永昌門清泰門慶春門艮山門湧金

門

鳳山門在城南與北關門對俗稱正陽門又東南

二里許宋有嘉會門南近鳳皇山爲禁垣北關

有和寧門入和寧門透大內直南有麗正門杭

州城垣創于隋楊素者周廣三十六里有竒廣



于錢鏐者七十里元時禁天下修城以示一統而內外城隍日爲居民所平至正十六年張士誠陷姑蘇據浙西五郡十九年發松江嘉興湖州杭州民夫復築焉晝夜併工三月而完城周六千四百丈有奇高三丈厚視高加一丈而殺其上得厚四之三焉舊城包山距河故南北長時則自艮山門至清泰門以東視舊則拓開三里而絡市河于內自候潮門以西則縮入二里而截鳳山于外禮部尚書貢師泰爲之記  
興遣曹國公李文忠將兵取杭州守將潘元明

納欵城隍皆如元舊○宋時和寧門內有學上院院內有玉堂摘文堂王仲衡詩云玉堂晝永暑風微簌簌飛花落小池徙倚幽欄憑問訊夏鷺飛出萬年枝

候潮門在城東而近南宋時有便門保安門今廢  
永昌門在城東宋名新門俗稱草橋門  
清泰門在城東宋名崇新門俗稱薦橋門又稱螺

螭門

慶春門在城東宋名東青門俗稱菜市門門之左  
宋有皇城司營武安泉水甚佳



艮山門在城東而近北俗稱壩子門艮山者南山之盡脉也言不踰尋丈今已陵夷莫可指索沿城五六里漫為平原土沃疇腴禾藪茂蓋餘氣之散衍耳

湧金門吳越王建門內有湧金池金華令曹杲所鑿也

衢巷河橋

入鳳山門而北至鎮海樓其街之東為雲錦橋義和坊義井巷集義巷通江橋懷信坊西為仁孝坊壽域坊天慶坊保民坊長慶坊

雲錦橋宋稱六部橋東通候潮門大河之水自龍山關入鳳山水門從南而北首過此橋次安和橋黑橋州橋通江橋會菲山河次聖僊橋新信橋會小河次三聖橋佑聖橋榮府橋柴塚橋積善橋清泰橋豐樂橋油局橋惠濟橋僊林橋登雲橋梅家橋折而西次通濟橋葛家橋天水院橋出武林水門洗馬橋抵德勝壩官商馳騫舳舻相銜晝夜不絕○六部橋之對宋有六部部各有尚書侍郎郎中員外郎凡二十四司吏部掌文武官吏選試擬注資任遷叙蔭補考課之



政封爵策勲賞罰殿最之法其屬四曰尚左尚  
右侍左侍右曰司封曰司勳曰考功戶部掌人  
戶土地錢穀之政貢賧征役之事其屬四曰左  
曹右曹曰度支曰倉部曰金部禮部掌禮樂祭  
祀朝會宴饗學校貢舉之政其屬四曰儀部曰  
祠部曰主客曰膳部兵部掌儀仗鹵簿武舉民  
兵廂軍土軍蕃軍四夷官封承襲之政輿馬器  
械之數土地城隍堡寨烽燧之圖籍其屬四曰  
兵部曰職方曰駕部曰庫部刑部掌刑法獄訟  
奏讞赦宥叙復之政敕律章程之式其屬四曰

刑部曰都官曰比部曰司門工部掌城郭宮室  
舟車器械符印錢幣山澤苑囿河渠之政營繕  
飭化之法其屬四曰工部曰屯田曰虞部曰水  
部其六部監門紀部官卯未之出入病疾之暫  
告與調制之可否署在大門之內○又北爲尚  
書省中書省門下省樞密院宋初門下省設官  
十有一侍中侍郎左散騎常侍各一人給事中  
四人左諫議大夫起居郎左司諫左正言各一  
人中書省設官十有一中書令侍郎右散騎常  
侍各一人舍人四人右諫議大夫起居舍人右



司諫右正言各一人尚書省設官九尚書令左  
右僕射左右丞左右司郎中員外郎各一人其  
屬六部蓋三省長官加平章政事者皆宰相職  
也初特別置中書于禁中與樞密使對政謂之  
兩府事關中書者中書宣奉門下省審覆付尚  
書省施行事關樞密者樞密宣奉門下省審覆  
付帥府施行尚書門下雖尊官不得參襄密勿  
故中書之權特重熙寧改制以侍中中書令尚  
書令官高不除而以左僕射兼門下侍郎行侍  
中之職右僕射兼中書侍郎行中書令之職建

炎初以左右僕射並加同中書門下平章事侍  
郎改參知政事而三省合爲一體乾道間改左  
右僕射爲左右丞相至是三省之名雖存而官  
非初制矣樞密院掌軍國機務兵防邊備戎馬  
之政招募閱試遷補屯戍賞罰之事設官十樞  
密使知院事同知院事樞密副使簽書院事同  
簽書院事都承旨副都承旨檢詳編脩而樞密  
使類以宰相兼之自簽書已上皆謂執政中爲  
都堂爲兩府會議之所刻周官一篇於正坐之  
屏堂中刻累朝詔勅文劄各有跋語自諫議大



夫而下別爲諫院省院監門封樞安邊所俱在大門之內

義和坊東通安和橋東有勝安倉卽聖安寺故址寺元貞二年建至正間毀爲軍器庫今爲倉基義井巷東通黑橋

集義巷東通州橋宋時與玉牒所貴恕坊對東有預備倉

通江橋本名慶元橋其東宋有都茶場雜買務權貨務雄武營北爲太醫局又東爲保安門今塞橋之南爲過軍橋北爲鄉義巷東爲三皇倉舊

### 爲三皇廟

懷信坊俗稱糝糲巷與長慶坊對近朝天門而東至聖僊橋者其北宋有裕民坊

仁孝坊俗稱清平巷西通清平山開元寺者其對宋有登平坊

壽域坊在白馬廟南西通七寶山山側宋韓侂胄第第近太廟鑿山爲園僭擬宮禁引青衣泉注于閱古堂秀石環繞絕類香林冷泉之景有桃天坡十二級夜宴則殿巖用紅燈數百出于桃坡之後以燭之其巖洞最勝者曰雲岫危峰隱石



淺灣深沼窈窕淳泓。自比于洞天福地云。

天慶坊宋稱太廟巷俗稱蘭子坊巷宋有太宗正  
司以叙族姓昭穆治其家政其南有玉牒所宗  
正寺元時有權茶提舉司

保民坊即城隍廟街西通金地山宋有司農寺太  
府寺將作監軍器監諸司諸軍審計司○司農  
寺隸戶部以幾察廩庾之出納少卿張維記云  
漢置九卿大司農其一也今倣周制爲六部以  
戶部掌國計而司農猶爲列卿贅矣況倉儲出  
納自昔太倉令主之蓋大司農之屬猶今之倉

部也以列卿而行太倉今日惟倉部要束是  
位雖尊勢出倉部下至于軍餉肅給罷于奔命  
世謂走卿辱矣○太府寺掌軍國之經費與縣  
官之私養奉悅幣定權量治鹽茗之劑劑班內  
外之廩稍覆其名數而鈎磨之頒財用于受藏  
之府周知入出斥幣餘互市之積以便貿易比  
物奠價俾從其抵儲藥物以除札瘥叙財幣以  
待上之賜好制券以通商賈○將作監掌管繕  
之事行都工作多以京尹畿漕分任之故監官  
多闕員凡臺省之次與郡邑之有聲者寄徑



於此號儲才之地。○軍器監掌繕諸軍器械。其御前所用者。別有提轄歸之殿司。○諸司諸軍審計司。分爲二局。各乘財用稍食之數。而會稽之屬太府寺。

長慶坊俗稱石龜巷。西通石佛山。宋有都奏進院。卽智果院舊址也。掌王言出納。與四方章疏。其南爲三執政府。乃宰相私第也。內有四眼井。鎮海樓。舊名朝天門。吳越王錢氏建。規石爲門。上架危樓。樓基疊石。高四仞。有四尺。東西五十六。南北半之中。爲通道。橫架交梁。承以藻井。牙

柱壁立三十有四。東西閤門對闕。名曰武臺。東敞可容兵士百許。臺左右北轉。登石級兩曲。達于樓上。樓之高六仞。有四尺。連基而會。十有一仞。貯鼓鐘。以司漏刻。元至正間。平章康里慶童改爲拱北樓。皇明洪武八年。行省劉王兩叅政者。失其名。改爲來遠樓。旣榜揭。遣折字人張乘槎者。往視之。槎曰。三日內。主哀喪之事。如期。王母死。劉以曆日紙坐法。王延乘槎問故。對曰。來帶喪形。遠從。帶哀形。旁之兩點。相續者。淚形也。頃之。參政徐本。改爲鎮海樓。詹孟舉署



扁其陰篆書吳山備觀四字。成化十年燬。明年重建。疊構三層。闌楯周繞。巨鍾轟鼓。左右懸架。更嚴之夕。鼓鑿角咽。按箭行籌。似落霄漢。間規制弘遠矣。○趙子昂同慶童丞相上拱北樓詩云。城上高樓接太霞。令器鐘鼓寂無嘩。提疆內向三千里。比屋同封百萬家。心在江湖存魏闕。身隨牛斗泛僊槎。舉頭便覺長安近。時倚闌干望日華。○楊仲弘詩云。地鼓聲迎日出。倚天梁棟傍雲浮。北瞻帝闕二千里。南控臣藩二百州。江海無波沉罔象。旌旗垂野駐貔貅。鸞迴麗

坊多沙。○南來第一州。○最高樓。○水分兩瀾。○趨都會。地接三吳。控上游。雲外鼓鑿嚴。夜禁城中車。蓋樂春遊。玉堂政暇。新題扁彩筆。飛光射斗牛。自鎮海樓而北。至清河坊。其街之東。折而北。為布市巷。沙皮巷。正東為興禮坊。西為吳山坊。融和坊。清河坊。

布市巷。宋時為貿布之所。東通望僊橋。沙皮巷。舊名清平坊。宋時酒館也。至今治肆不徹。興禮坊。西與清河坊對。東通新官橋。



吳山坊內有大井周四丈吳越時韶國師所鑿品  
其水為錢唐第一蓋山脈融液獨源所鍾不雜  
江湖之水泓深瑩潔異于衆泉宋淳祐丁未大  
旱城井皆涸獨此井日下萬縷不減不盈都人  
神之安撫趙與憲立祠其畔洪丞初參政徐本  
立石刻吳山第一泉五字紀宋事于碑陰內有  
金銀雜色魚長數尺者或隱或顯相傳來自井  
底泉眼中者

融和坊宋稱灌肺新街內有灌肺嶺

清河坊與興禮坊對宋有張循王俊賜第在焉俊

封清河郡王故稱清河坊今改甸宣街

自興禮坊而北至賢福坊為灌肺巷通和坊晉濟巷  
寶佑坊五間樓自清河坊而北至文錦坊為太平坊  
惠民坊巾子巷中瓦巷甘澤坊

灌肺巷西與融和坊對內有灌肺橋宋為珠子市  
通和坊東通金波橋宋有花月樓又東為熙春樓  
南瓦子又南為抱劍營漆器壙沙皮巷融和坊  
其西為太平坊巾子巷獅子巷皆為瓦市各有  
等差酒客登門則有提瓶獻茗者謂之點花茶  
登樓甫飲一杯則先與數貫謂之支酒然後呼



西泠志卷之三十一  
十  
喚提賣趕趁祇應者亦皆紛至浮費頗多妓家  
富者酒器沙鑼冰盆火箱粧盒之類悉以金銀  
爲之帳幔裯褥多用錦綺器玩珍奇他物稱是  
下此者亦競尚鮮華自酒器首飾被臥衣服之  
屬各有貨者

普濟巷東通普濟橋又東爲柳翠井在宋爲抱劍  
營地相傳紹興間柳宣教者尹臨安履任之日  
水月寺僧玉通不赴庭叅宣教憾之計遣妓女  
吳紅蓮詭以迷道詣寺投宿誘之淫媾玉通修  
行五十二年矣戒律凝重初甚拒之至夜忿不

勝駘蕩遂與通焉已而詢知京尹所賺也慚愧  
而死志曰吾必敗汝門風宣教尋亡而遺腹產  
柳翠坐蓐之夕母夢一僧入戶曰我玉通也既  
而家事零落流寓臨安居抱劍營柳翠色藝絕  
倫遂隸樂籍然好佛法喜施與造橋萬松嶺下  
名柳翠橋鑿井營中名柳翠井久之旱亭山顯  
孝寺僧清了謂淨慈寺僧如晦曰老通墮落風  
塵久矣盍往度之如晦乃以化緣詣柳翠爲陳  
因果事柳翠幡然萌出家之想如晦乃引見清  
了清了爲說佛法真旨及本來面目且厲聲曰



二十八年烟花業障尚爾耽迷耶柳翠言下大悟歸即謝鉛華絕賓客沐浴而端化歸骨舉亭山從所度也

寶祐坊東通寶祐橋其南宋時有榮王府看街樓五間樓在亨橋東與三元樓對宋時民間市樓之有名者曰三元曰五間曰熙春曰賞心曰花月曰日新其厨店分沽則有嚴厨翁厨任厨陳厨周厨沈厨鄭厨康厨沈銀杓等店每樓各分小間十餘器皆銀飾各有私名妓數十輩凭檻招邀謂之賣客又有小鬟不呼自至歌吟強賂以求

支分謂之擦坐有吹簫阮阮息氣鑼板歌唱散耍等人謂之趨趨有老姬以小爐炷香為供者謂之香婆有以泔製青出杏仁半夏確砂荳蔻小蠟茶香藥韻薑砌香樞攪薄苛至酒閣分俵得錢謂之撒嚙有賣玉面狸鹿肉糟決明糟蟹糟羊蹄酒蛤蜊菜魚鰕芥鱸乾者謂之家風有賣酒浸江蟠章舉礪肉龜脚鎖管密丁脆螺鬚醬泔鰕子魚鱸魚諸海味者謂之醒酒山味凡下酒羹湯任意索喚雖十客各欲一味亦自不妨過賣鎗頭記憶數十百品傳唱如流即時供

今都門尚有此風



應酒未至則先設看菜數碟及舉杯則又喚細菜如此屢易愈出愈奇歌管歡笑之聲每夕達旦。往往與朝天車馬相接。雖暑雨風雪不少減也。

賢福坊一名東文錦坊俗稱壩東巷舊傳江潮至

此有壩限之東三平津俗稱猫兒橋

太平坊東與通和坊對

惠民坊洪武十七年置醫學于此

巾子巷舊名市南坊

中瓦巷之南宋時有武林園通後市街稍北為龍

### 龍宮

甘澤坊與寶祐坊對

文錦坊西通三橋街者俗稱洋壩頭

自賢福坊而北至義和坊為安平巷末清巷日新巷

自文錦坊而北至壽安坊為連一巷脩義坊富樂坊

最樂坊教睦坊泰和樓積善坊秀義坊

安平坊東通方便橋

永清巷舊名蘭陵坊俗稱水巷東通永清橋

日新巷宋有日新樓東通日新橋

義和坊西與壽安坊對東通芳潤橋



連二巷宋有連二茶坊

脩義坊俗稱肉市巷又稱姜椒巷西通軍將橋

富樂坊俗稱賣馬巷內有狗兒嶺今夷為平路

最樂坊舊名衆樂坊俗稱虎跑巷後通大瓦子亦

曰上瓦宋時瓦子有名者十有三在城則南瓦

中瓦上瓦下瓦蒲橋瓦城外則便門瓦候潮門

瓦小偃瓦新門瓦薦橋瓦菜市瓦錢湖瓦赤山

瓦舊瓦嘉惠瓦新瓦艮山瓦羊坊橋瓦王家橋

瓦龍山瓦皆辟花所聚蓋取聚則瓦合散則瓦

解之義也

教睦坊一名敦睦巷其南宋有銀甕酒庫

泰和樓宋時城中官沽有八樓曰和樂曰和豐曰

中和曰春風曰泰和曰西樓曰太平曰豐樂皆

屬戶部點檢所樓各有庫每庫祇直數人官妓

數十人飲客登樓則以名牌點喚侑觴謂之點

花牌金銀器皿取自庫中徃徃學舍士夫所據

外人未易登也

積善坊俗稱上百戲巷西通施水坊橋內有幢子

巷秀義坊俗稱下百戲巷內有東平王廟



壽安坊俗稱官巷。又稱冠巷。宋時謂之花市。亦曰花園。蓋汴京有壽安山。山下多花園。春時賞燕。爭華競靡。錦簇繡圍。移都後。以花市比之。故稱壽安坊。

自壽安坊而北至衆安橋。其街之東爲武志坊。戒民坊。新安坊。西爲忠孝坊。脩文坊。里仁坊。保信坊。定民坊。百福巷。彌教坊。十官宅巷。棗木巷。資福巷。下瓦巷。武志坊東通李博士橋。

戒民坊東通棚橋。宋爲行刑地。故號鬼門關。又曰陰山道。入巷過棚橋。宋時謂之棚樓。粧點勾欄之所。其對爲中和樓。乃銀甕中庫。元時平準庫在焉。

新安坊俗稱新安橋。巷有千勝將軍廟。忠孝巷俗稱崔家巷。

脩文坊西通洪福橋。宋有將作監。里仁坊西通鞞鼓橋。宋稱陶家巷。保信坊俗稱剪刀股巷。

定民坊與戒民坊對。俗稱中棚巷。舊有棚心寺。佛牙塔雙井。

百福巷。舊有百福院。唐天福中錢氏建于城外。乾



道五年徙棚橋至正間燬

彌教坊俗稱狗兒山巷宋名睦親坊今有睦親井  
尚存有宗學在焉先是宋分宗子為六宅宅各  
有學南渡後惟置睦親一宅紹興四年始置諸  
王宮太小學嘉定九年改宮學為宗學凡曳籍  
玉牒者無間親踈皆肄業焉三年一試如太學  
法有明倫立教汲古等堂貴仁立愛大雅明賢  
懷德升俊等齋自此而西街之南為蕭相國祠  
又西為金鈎巷街之北為新慶巷北通匾擔嶺  
隱隱起伏蓋南山之盡脉也又西為花園巷又

西為洗麩橋

十官宅巷宋時有宗室之子十人居此故名

棗木巷西通石湖橋宋時范成大所居號石湖故  
名其北為結縛橋相傳宋時下瓦勾欄觀者雲  
集時馬光祖尹京令行禁止得遺物者結縛于  
此以待失者故名其東為匾擔嶺宋為沂王府  
下瓦巷亦曰北瓦內有勾欄十三座北有瓦子橋

舊名衆樂橋

自興禮坊而東至舊達達城其街之南為沙皮巷布  
市巷過新宮橋為夾牆巷北為熙春橋街清冷橋街



鍾公橋街佑聖觀街

新宮橋俗稱宗陽宮橋小河之水自新宮橋分派  
從東而西過鍾公橋清冷橋折而北過熙春橋  
灌肺橋金波橋普濟橋保祐橋巧兒橋亭橋舍  
人橋方便橋永清橋日新橋芳潤橋李博士橋  
棚橋新安橋度生橋北橋軍頭司橋清遠橋自  
萬倉橋折而東與大河合流出武林水門俗稱  
市河是也其支派自觀橋而西合清湖河以北  
亦曰市河  
夾墻巷宋時德壽宮墻外委巷也

熙春橋宋有熙春樓南瓦子

清冷橋南通沙皮巷北通漆黑墻

鍾公橋通上下抱劍營本名寶劍營錢王屯軍之  
所又北通集慶巷

佑聖觀街自宗陽宮折而北東為巡鹽察院北為  
市舶司佑聖觀之東為武林驛西為錢唐學水  
亭子

自清河坊而西至杭州府治其街之南為康裕坊吳  
山坊大隱坊安樂坊懷慶坊豐和坊龍舌頭北為南  
新街清望街德化街十三灣巷泰和坊天井坊文明



坊

康裕坊俗呼八作司巷宋有御史臺中為臺廳謂  
之朝堂有御史閣位廳以內為西監察位又內  
為殿中位又內為中丞侍御史位臺獄之門扁  
曰四推南渡鮮置對有屬臺官讞問者則刑察  
就聽于大理之獄

吳山坊直北與後市街對內有報恩寺

大隱坊一名小僊巷宋徽宗時有處士徐奭居此  
徵辟不起賜號冲晦先生

安樂坊上通金地山直北與華光巷對

懷慶坊由此以登寶月山者

豐和坊近龍舌頭可通清波門者在天井坊對北

龍舌頭蓋當寶月蛾眉兩山之際蜿蜒而來若龍

舌之吐者

南新街內有憐忠祠

清聖街舊名新街即後赤街

德化坊舊有仁和衛

十三灣巷分東中西三道內有惠安寺

泰和坊俗稱華光巷亦稱糯米倉巷

天井坊在布政司右舊名通湖坊今廢其對山有



天天井按臨安舊志所載城中之井自相國而下  
表有名者六十自吳山而下有名者三十有一初  
十無天井之名獨於黑龍潭云在寶月山一名天  
井山天晴則潭水碧色有雨則先期變黑蓋指  
青黑龍潭爲天井也嘉泰二年清河坊大火郡守  
甫丁常任行視火場得潭井于御史臺西小巷中  
深五十餘尺廣十餘尺淘斃清潔其泉迸盈得  
薪建炎錢數十枚其堙塞必在建炎後也  
文明坊即中和坊亦名淨因坊聞兒頭從此而北  
則宋爲樓店務又北爲戒子橋元爲燒鈔庫今爲

黃冊庫又北爲定安橋宋有慈幼局施藥局○  
慈幼局淳祐七年建凡民間遺棄小兒有願收  
養者月支錢一貫米三斗二歲乃止無人收養  
者官爲顧乳有願子者從官請之○施藥局淳  
祐八年建元時改爲醫學提舉司今併入都指  
揮使司

杭州府前爲宣化橋其對爲仁美坊安阜坊其西爲  
流福坊

宣化橋宋時俗稱懊來橋至今仍之謂好訟者與  
作惡而被刑者至此皆有悔心也



仁美坊俗稱石板巷宋時有三通判衙又東爲水  
宣溝巷

安阜坊舊名近民坊從此而南有淨因塔俗稱塔  
兒頭

流福坊在府西水口透城外引湖水從西而東經  
府前至文明坊折而北過戒子橋定安橋凌雲  
橋福寧橋轉運橋合湧金池之水今水口雖淤  
而條脉猶可考也蓋宋已前自錢湖門至錢唐  
門引湖水入城者爲明溝五道暗溝十五道明  
溝者一爲清波閘即流福水是也二爲湧金閘

即湧金池是也三爲集賢亭水窰四爲集賢亭  
後閘今成化間所導經蓮花橋出曲阜橋者是  
也五爲菩提寺閘暗溝者李泌所開六井沈文  
通所開南井蘇軾所開新溝通貓兒橋及雄武  
營者而布政司前百獅池西通西湖東出水於  
普濟橋又仁和學府學前亦有暗溝繞樞星門  
出於凌雲橋者是也餘不可考夫久廢者固不  
可復矣有踪跡可尋而坐視堙梗非郡城之利  
也

後市街宋時爲棋子圍有龍翔宮孟太后宅李皇



后宅全皇后宅六眼井直南與吳山坊對先是  
宋時車駕朝饗景靈宮由御街過朝天門經中  
瓦前直下回則自洋壩頭橫入龍翔宮自太平  
坊出御街寶祐癸丑十二月大火遂從御街當  
中取大路直入中瓦之右以爲武林園其左以  
爲皇子忠王望湖樓其時旅邸有題壁云龍翔  
宮闕壯皇都鑾路縈廻枉德車天意也知明主  
意故教劫火闢通衢

沈公井巷可通脩義坊者宋嘉祐中郡守沈文通  
于六井之南引湖水以河東至美俗坊爲大井  
名曰南井宋熙寧間井廢郡守陳述古疏湧金  
池爲上中下澣衣洗馬者不得及上池列二牖  
于門外其一赴三池而決之河其一納之石檻  
比竹爲五筒以引之並河而東絕三橋入于石  
溝注于南井元祐間復廢民率以七八錢買水  
一斛蘇子瞻復命僧子珪治之以瓦筒易盛以  
石槽疏于朝卽以子珪之號號其井曰惠遷井  
井傍有奉慶院宋嘉泰元年僧智師建又有小  
悟空寺今廢

大瓦巷北通保康巷元時詩婦朱淑真居此



石樞園巷通張司馬巷 國初有鎮撫司

三橋街東通文錦坊西至湧金門北通剪刀街南

過惠遷橋

自義和坊而東至肅義街過芳潤橋其街之南爲鐵線巷普寧巷豐樂橋忠孝巷雙井巷安福巷北爲固寧巷興忠巷安平巷馬市巷昇平巷南班巷

芳潤橋俗呼炭橋宋時爲藥市又北爲書坊沿河而南爲善履坊

普寧巷卽柴木巷宋時有柴木場于此通薦橋上中沙巷

豐樂橋宋有豐樂樓酒肆其北有橋園亭宋時此地多樹橋號橋園高宗幸建康于此登舟作亭臨河故稱橋園亭也亭傍有夏皇后宅十少保府其南爲狗兒山隱隱地中無可登陟其東有常惠井橋之上有華光廟其北有青字營

忠孝巷舊名中沙巷

固寧巷內小巷曰諸投巷相傳宋時行市各有分地而此巷獨無禁厲其北爲油局橋宋時爲油蠟局

馬市巷宋時爲馬市于此東北通南班巷茅郎巷



昇平巷今爲皮市內有上四眼井下四眼井玉陽

庵

南班巷宋時宗室子列南班奉朝請者居之

白壽安坊而西至井亭橋其街之南爲二僊巷興德

巷八僊巷鑷作巷成娘娘巷北爲花市巷馬家營巷

新房廊巷

二僊巷元時詩人張光弼居之胡虛白挽詩云二

僊坊裏張員外頭白相逢只論詩今日過門人

不見小樓春雨燕歸遲

興德巷南通神堂巷

八僊巷宋有八僊茶坊其時茶坊之有名者曰八

僊曰清樂曰珠子曰潘家曰連二曰連三坊中

插四時花卉名人圖畫糕點店面所賣有七寶

插茶餛子葱茶或賣鹽豉湯暑天則賣雪泡梅

花酒或縮脾飲之屬孟杓蓋子皆以銀爲之亦

同酒肆論一角二角茶樓多富室子弟諸司下

直人等會聚習學樂器上教曲黠之類謂之掛

牌兒人情

鑷作巷西連百子圖巷

成娘娘巷宋時皇后無成姓亦無賜宅于花市者



俗云神娘娘巷豈訛而爲成歟  
花市巷宋時作鬻花朵者居之今壽安坊兩岍多  
賣花之家亦其遺俗也

馬家營巷錢王屯軍之所北通脩文坊  
白井亭橋而西爲甘泉坊相國井

甘泉坊與井亭橋對相國井有二皆唐鄴侯李公  
泌所鑿也自江湖避錢唐而擊西陵沮洳鹵斥  
化爲平原今之城市聚落皆江流故地也其水  
苦惡惟負山鑿井乃得甘泉而所及不廣唐宰  
相李泌當德宗興元時守杭州始作六井引湖

水以濟民其最大者在古清河爲相國井其西  
爲西井又名化成井少西而北爲金牛池又北  
而西附城爲方井爲白龜池又北而東至錢唐  
縣舊治之南爲小方井金牛之廢久矣出湧金  
門並湖而北有水牖二注以石溝貫城而東者  
相國方井之所從出也若西井則相國之別派  
也而白龜池小方井皆爲匿溝湖底無所用牖  
此六井之大畧也長慶間白居易續鄴侯之績  
而浚治之民以爲利宋熙寧間六井皆廢民苦  
遠汲郡守陳述古命僧仲文子珪等董其事發



溝易甃補苴罅隙而相國之水清冽溢流千艘更載而賀之元祐五年蘇軾復引六井餘波至威果雄武五營之間創爲二井乾道三年轉運周琮重加浚治淳祐七年安撫趙與憲自湧金門北至錢唐門水口所入咸作石櫺禁民不得植芰荷以穢水咸淳間內侍陳敏賢築室于靈芝寺前劉公正于相國祠前洗馬御史鮑度劾之遂皆奪職自宋迄今將三百年曠廢不理惟相國井西井僅存而城中之井無慮數萬餘未必全賴六井也唐宋守臣遞相修浚旋復壅塞

蓋延引紆遠則筒槽崩裂而相國西井至今不竭者蓋有自然之源不係于水口之修不修也父老言大旱若宋淳祐間西湖龜拆六井斷流獨吳山大井日下萬縷遠近賴之蓋自宋以前城市地脉猶帶江滋故多苦惡迨今去江日久土膏融液霖雨滲漑鹵弁全消淳釀其淡凡井皆良故六井之利不顯當鄴侯時民之仰賴者豈可同日語哉○過井亭橋而西宋有俞家園諸天閣華嚴院鶴林宮激賞庫卿監郎官宅○俞家園在宋初皆荒池污畝芟稻雜植行潦所



歸故諺云俞家園一雨便撐船自爲行都而閭閻輻輳遂成平原其南有九官宅○諸天閣華嚴院晉天福間建尋燬宋紹興三年重建丞相梁克家手書華嚴經一部建輪藏仍作亭于相國井上元末燬○鶴林宮宋慶元間旱道士劉友真者禱雨而應遂請以所寓舍崇奉天將賜額曰鶴林○激賞錢庫以供三省樞密院公用者庫西爲小方井其激賞酒庫在錢唐縣南自泰和坊而北至井亭橋其河之東爲普濟橋侍郎橋軍將橋施水坊橋河之西爲油車巷曲阜橋欽善

坊

普濟橋上有華光廟俗稱斷河頭合湧金之水過惠遷橋軍將橋施水坊橋井亭橋洪福橋鞞鼓橋馬家橋八字橋石湖橋結縛橋折而東過衆樂橋衆安橋度生橋與市河合宋咸淳六年安撫潛說友因斷河堙塞開至清湖橋凡四千二百一十九

侍郎橋宋真宗時工部侍郎郎簡所居簡字叔廉性和易喜賓客治園廬以蒔花木導引服餌顏如渥丹善醫術至老不衰郡守孫沔表其里曰



仁壽坊

軍將橋宋有茉莉園

油車巷之西宋有度牒庫德壽橋今廢入織染局  
曲阜橋在靈壽寺坊前宋有韓樞密府

欽善坊舊名聞善子巷宋有柴場

自井亭橋而北過甘泉坊至清湖橋其街之東爲洪  
福橋鞞鼓橋馬家橋西爲鮑生姜巷清風坊清河坊  
癸十街

洪福橋之對宋有紫雲坊東有樞密五房院西有  
惠利井又名玉蓮池引湖水以入城者水口在

舊玉蓮堂基北有楊和王府第王名存中本名  
沂中字正甫紹興間賜名存中代州崞縣人從  
高宗南渡累立戰功封和義郡王高宗假借諸  
將而眷存中尤深第當清湖洪福兩橋之間規  
制甚廣自居其中旁列子舍皆極宏麗落成之  
日縱人遊觀一僧善相宅云此龜形也得水則  
吉時和王方被殊眷從容爲上言之欲引湖水  
以環其居高宗首肯曰朕無不可第恐外庭有  
言宜密速爲之和王即督濠寨兵且募民夫晝  
夜作陰道引水入自五房院出自惠利井蜿蜒



縈遶數百丈再宿訖事未幾臺臣有疏言擅灌湖水私築以象宮禁者上曉之曰朕南渡初群盜蜂起用羈縻策刻印封之所有淮淝數郡賴諸將宣力群盜悉平朕籍土地外府庫金帛俱置不問故諸將有餘貲以治泉池第圃以存中之功雖盡賜西湖曾不爲過況此役已成願卿等容之言者遂止既復建傑閣藏思陵御劄以御書風雲慶會四字扁之蓋取大龜俯首下視西湖之象以成僧說自此百餘年間無火災紹定間其家捨閣于佑聖觀相者謂龜失其首次

年五月大火潭潭數百楹不數刻而燼云

鞞鼓橋之對宋有崇訓坊

馬家橋之對宋有孝慈坊

清風坊宋稱活水巷有莊文太子府

清河坊宋稱古清河坊

癸辛街相傳楊和王建子第於府側取癸辛方向其門巷曰癸辛街宋季有有周密公謹居此所著有癸辛雜識齊東野語元時有省府廣濟庫洪武初賜爲曹國公李文忠宅永樂間籍于官

今爲民居



清湖橋與洗麩橋分跨兩河若八字然故名八字橋其水過安濟橋安福橋丁家橋長生老人橋紀家橋車橋長壽橋新莊橋師姑橋中正橋出城外

西湖遊覽志第十三卷終

西湖遊覽志第十四卷

南山分脉城內勝蹟

衢巷河橋

入湧金門而東至三橋街其街之南為湧金池轉運橋永安橋惠遷橋北為鑷子井友助巷焦鷄巷六房巷

湧金池吳越王時金華令曹杲所鑿也楊蟠詩湧

金春色晚吹落碧桃花一片何人得流經十萬

家郭祥正詩衆沼皆涵壁斯池獨湧金寶光終

錢唐田汝成輯撰



夜見不是月華深

轉運橋俗稱渡子橋從此而南爲普安橋在運使前河西有桑園巷併入運司又南爲福寧橋與油車巷相通併入織染局又南爲凌雲橋在府學前其對宋有豐豫坊

永安橋在織染局前宋稱臺後橋

惠遷橋一名金文橋其南宋有金文酒庫內有羅漢洞疊石峴欽塑羅漢於其下其里宋名金俗坊又南爲太常寺昭勲崇德閣繪趙普曹彬等二十四人從祀太廟者內有汲古泉又名觀音

泉乃法慧寺舊井宋時有石刻云此泉清甘雖旱不竭故老相傳飲之有疾者愈宜夢護之嘉泰改元立石今歸布政司

鑷子井在上方寺南水口在湧金門外城下有水門成化十二年所開者引西湖之水由柳洲寺後入城過紅蓮花橋白蓮花橋出曲阜橋合西湖之水

友助巷俗稱四條巷北通洗布園

六房巷與臺後橋對舊有如意橋北爲帳前營

入清波門而東至龍舌頭其街之南爲菜市巷鐵冶



嶺郭璞井巷金剛嶺巷螺獅山巷聯桂坊北為聖祖巷四條巷石板巷關王廟巷

鐵冶嶺宋名豐寧坊南上雲居山者街左仁靜巷宋有景獻太子府嶺下有相公井紹興間節度使趙密所浚

郭璞井相傳晉郭景純所相度者蓋其時杭城苦斥鹵之水甘泉難得景純善相地脉故凡美井多託郭氏為名土人訛為郭婆井

螺獅山一名狗兒山上通烏龍潭

聯桂坊元至元間有周氏兄弟舉進士並登甲榜

故名

聖祖巷直北為荷花池

四條巷通塔兒頭

清波門之南宋有錢湖門今塞門之內有牙兵寨虎翼營教駿營騏驎營白鱗井

入候潮門向西折而北透永昌門大街至下馬坡其街之東過諸家橋為烏盆場巷東花園道義巷大覺巷高陽閭巷西為大營巷官井巷談郎步巷撫寧巷獅子巷福地巷大德街廣福巷

候潮門宋時西向元時改西北向入門宋有都亭



驛驛左有打繩巷侍從官宅從此而西直六部  
橋稍北爲州橋有吳太后宅元有金玉總管府  
候潮門之東舊有茅山高可尋丈有河經之曰茅  
山河入保安水門過保安橋過軍橋折而北合  
流通江橋  
烏盆塲巷南通水門

東花園宋時此地多名園高孝兩朝嘗幸東園閱  
四市至今有孔雀園茉莉園等名

高陽間巷俗訛爲羔羊巷內有慈雲寺巷口爲羊  
市

大營巷東通勝安倉

撫寧巷內有伏虎廟

獅子巷折北有祇園寺

福地巷折北有旌德觀 國初有浙西分巡道其

北通姚園寺巷

廣福巷舊名寨口巷

馬坡巷宋時稱馬婆巷蓋其時在城外馬院近之

教駒遊牝皆于此地故名馬坡耳自東花園而

南爲上馬坡北抵清泰門大街爲下馬坡

入永昌門而西過昇僊橋至望僊橋其街之南爲上



馬坡巷竹竿巷總寧巷武寧巷北爲保安巷下馬坡巷演教寺巷什物庫巷板兒巷馬院巷

竹竿巷南通獅子巷北對板兒巷

總寧巷俗稱竹椅巷南通保安橋北對馬院巷

武寧巷一名牛羊司巷宋建牛羊司于此掌御膳牲及祭祀之牲有滌宮在赤山

保安巷俗稱水僊巷

演教寺巷內有演教寺

什物庫巷宋時建什物庫于此

板兒巷一名白花蛇散巷北有景隆觀靈順宮金

剛寺安樂園平安一橋平安二橋平安三橋俗稱爲閩富橋乃斷河之水也

馬院巷宋建馬院于此內有馬眼井

望僊橋之東宋有德壽宮蔣院使花園紹興十五年四月秦檜建第落成初望氣者言此地有鬱葱之祥檜專國實覬覦焉請以爲策檜死高宗將倦勤乃即第築新宮名德壽紹興三十二年禪位于孝宗遷居之以朝禁爲南內以此宮爲北內鑿池引水壘石爲山象飛來峰建冷泉亭規制宏麗詳見備安佚豫志中孝宗內禪移居



此宮改名重華後寧宗以奉憲聖太皇太后改  
名慈福壽成皇太后居之改名壽慈當高宗時  
得盤松一本于聚景園中移植宮苑奇秀絕倫  
高宗嘗自爲贊曰天錫瑞木得自嶽岑枝蟠數  
萬榦不倍尋怒騰雲勢靜奏琴音凌寒鬱茂當  
暑陰森封以腴壤邇以碧濤越千萬年以慰我  
心又嘗躬製祭文祈神保護其文曰維淳熙五  
年歲次戊戌十一月日太上皇帝遣具階張宗  
尹特設牲牢旨酒珍果香花致祭于本宮土地  
之神神有百職職各不同典司草木土示是供

我遊湖園乃獲奇松植之禁苑自態千容娑娑  
偃蓋天矯騰龍翠色凝露清音舞風醉吟閑適  
予情所鍾壘培封殖久或力窮鳥鳥外擾蟻蠹  
內攻神其勦絕勿使能終精邪竊據盜斧適逢  
神其呵逐勿使遺踪常令勁節坐閱隆冬堅踰  
五柞弱異雙桐歷千萬年鬱鬱葱葱牲牢旨酒  
嗣錄汝功尚饗

入清泰門而西過崇新橋春熙橋至清泰橋其街之  
南爲水僊巷安肅坊崇新巷兩場巷春熙巷九曲巷  
佑聖巷義井巷寧海巷北爲同德坊蒲塲巷崇新巷



石板巷北場巷熙春巷豐禾巷高橋巷忠孝巷

南安肅巷南通下馬坡內有香餅園菩提巷

崇新巷南通板兒巷

春熙橋一名裝駕橋相傳宋高宗自越州渡江還

臨安泊舟裝駕于此蓋其時橋在城外故也土

人訛爲臧家橋

南場巷北對北場巷內有假髻堦

春熙巷北對熙春巷

九曲巷對小學巷

崇聖巷南通祐聖觀

義井巷俗稱四眼井咸淳志云水宜染紫

寧海巷俗稱林木梳巷

同德坊南對安肅坊北爲北營

崇新巷自北而西爲淳祐橋直北爲橫河橋

石板巷內有胡蘆堦

熙春巷宋有雙茶坊

豐禾巷宋有豐禾倉

忠孝巷俗稱中沙巷北通回回新橋舟行上河者

棧此  
入慶春門而西至延定坊其街之南爲新開路蒲塲



巷普庵坊瓦子巷過菜市橋為保信巷舊城基蕭義坊福佑巷過蒲橋為上八界巷下八界巷清寧巷過惠濟橋為興忠巷嘉新坊延定巷北為文東巷清平街花斗巷信善巷東清巷忠清里安眾巷小福清巷七寶巷大福清巷木場巷醋坊巷

新開路舊名麻柴巷又名刀茅巷

瓦子巷宋名菜市橋瓦

菜市橋舊在門外上唐沙地宜菜故宋時有東菜西水南柴北木之謠其河曰菜市河又曰東運河其源本通保安水門自宋築德壽宮而堙之

故稱斷河頭也其水過闔富橋春熙橋淳祐橋橫河橋慶春橋壩子橋出艮山水門

保信巷一名保寧巷南通回回墳中班街

舊城基元時禁天下修城故杭城日毀至正十九年張士誠據兩浙改築杭城自艮山門至清泰門展出三里而絡市河于內此其舊基也

蕭義坊內有佛慧寺

福祐巷俗稱皮市巷折而西南有荷花池紫瓊觀蒲橋東塊宋為昌樂坊下八界巷宋有崇恩延福院



清寧巷內通西北巷

惠濟橋俗稱鹽橋宋時鹽船待權于此上有廣福

廟西塊宋爲興德坊而西南有廣福寺

興忠巷南通豐樂橋嘉新坊俗稱七郎堂巷又稱祖廟巷國初有鎮

撫司

延定巷俗名糲子巷

文東巷北有潮鳴寺回龍橋

花斗巷內有多佛寺

信善巷一名信扇巷

東清巷內有半只寨海螭溝

忠清里本名昇平巷北爲褚家堂正德十六年里

人胡世寧爲都御史時御史唐鳳儀按浙欲爲

世寧建坊於門閭世寧辭之曰僕計偕時已得

坊費後遭宸濠之難被逮京師當道義助補前

之缺家人先後妄費非有司不曾加惠也豈敢

瞞昧再叨厚貺竊念僕居近褚堂以遂良故里

得名近世同里有王公琦者歷官教職御史僉

事皆有政蹟而清介絕俗晚年休歸枵腹以歿

諸孫見爲傭工項公麟者歷官司務員外郎中



文學廉孝冠絕一時而病歸四十餘年閉戶以終一子貧贅依人蓋以俗尚通達而賤方介以致二公泯滅如是也此堂街口有平安坊蓋取在籍坊名爲額今廢已久欲請于官復造一小石牌上刻三公名氏更題曰忠清里以勵夫人而後死者亦與有榮焉鳳儀從之嘉靖二十六年布政使李默併勒世寧名于上里內東有樞密巷軫轄巷宋有軫轄司威乙巷西有大東門轉南樓子營鑿石巷夾道小夾道梅東巷安衆巷內有青字營錢王所立

七寶巷內有七寶寺

醋坊巷宋時有醋庫十二一在此一在府街後一在茅市橋一在小新營一在棚北橋一在洋壩頭一在井亭橋一在朝天門一在三橋一在龍舌頭一在范浦一在江漲務

入艮山門折而東南爲廣豐倉廣積倉淳祐橋巷白洋池田家灣通齊橋梅家橋

廣豐倉在艮山門內河西

廣積倉在艮山門內河東

白洋池在通濟橋東周三里深不可測時有神物



潛焉宋淳祐丁未大旱湖水皆涸茲池汪濊如  
故郡人趨汲之至有携鬻市中者池上有張家  
寺

通濟橋俗稱梅東高橋其傍有臘脂橋

西湖遊覽志第十四卷終

西湖遊覽志第十五卷

錢唐田汝成輯撰

南山分隸城內勝蹟

官署

巡撫都察院巡按察院巡鹽察院清軍察院布政使  
司布政分司都指揮使司都轉鹽運使司杭州府杭  
州前衛杭州右衛仁和縣錢塘縣杭州府儒學仁和  
縣儒學錢塘縣儒學織造府吳山書院市舶司杭州  
府稅課司武林驛鹽倉批驗所惠民局  
巡撫都察院入裕民坊在通江橋東舊為清軍察



院嘉靖二十六年以海寇擾越中設都御史提督軍務以此為行臺  
巡按察院在正陽門北元時置江南行御史臺歲遣監察御史二員分巡省地當時有兩察院一在按察司右紀家橋邊者名北察院守省御史居之一在朝天門外正陽門北者名南察院監燒昏鈔御史居之即今所也 國朝歲遣御史分巡浙江則猶元時守省之職而按察使副使與御史參舉吏治其初權等耳乃今重內輕外而激揚之權總歸御史矣

巡鹽察院在宗陽宮東舊為太平興國傳法寺其南宋初普照法師建 皇明正統三年遣御史巡視兩浙催督鹽課遂改寺為行臺

清軍察院即今巡撫都察院也舊為三皇廟廢址先是清軍御史寓朝天門外西天寺正德間改建于此

布政使司宋南渡初為殿司寨尋改安撫司治復改秘書省元至元間遷江淮行省于此總兩浙福建江西四道并開元宮址廣之至正十九年析福建一道置行省 國初天兵平浙因元舊



置浙江行中書省。洪武九年改承宣布政使司。置左右布政使、參政、參議。十五年割直隸嘉湖二府來屬。凡屬府十有一，州一，縣七十有五。司內有紫薇樓，門外百獅池，皆宋元故稱。蓋紫薇中書省之微號，而百僚師師亦宰相之法像也。樓後有山，疊石蒼翠，嘉樹森列。乃元時丞相別業。見怯不花所治。山下有松化石，節理宛然，枯枿也。經歷司、照磨所、理問所、司獄司、廣濟庫皆在司內。

宋秘書省以藏累朝御著信史古書彝器名畫汴

京建于禁中。紹興初，寓法惠寺。十三年始建于此。省內有右文殿、秘閣、國史院、道山堂。著作之庭、國史、日曆所、書庫、寶庫、群玉堂、席珍亭、渾儀臺。其前有方等院。○淳熙五年九月十二日，孝宗臨幸秘書省，賜丞相史浩以下官詩云：玉軸牙籤煥寶章，簪紳侍列映秋光。宴開芸閣儒風盛，坐對蓬山逸興長。稽古右文慙菲德，禮賢下士法前王。欲臻至治觀熙洽，更罄嘉謀爲贊襄。著作權禮部郎呂伯恭和云：麟閣龍旗日月章，中興再見赭袍光。仰觀焜燿人文盛，始識扶持



德意長。功利從今卑管晏。浮華自昔陋盧王。願將實學酬天造。敢効明河織女襄。又獻詩二首。云麟臺高柳識瑤輿。共記中興幸省初。黃道再傳天子蹕。青編重入史臣書。需雲下際君恩盛。晨露高張樂節舒。若寫鴻猷參大雅。定非周鼓頌岐澳。又云紫清丹極與天隣。闔闢乾坤繫矣。顰獨爲斯文回一顧。坐令吾道重千鈞。先王舊物參差見。列聖明謨次第陳。墨客區區感榮遇。豈知深意在彝倫。○周公謹遊秘書省記云。乙亥歲秋。監丞黃汝濟以蓬省旬點。邀予偕行。予

于是具衣冠。型拜右文。然後遊道山堂。堂故米老書扁。後以理宗御書易之。著作之庭。胡邦衡所書。曰蓬壺。曰群玉堂。堂屏坡翁所作竹石。相傳淳熙間。南安守取之。長樂寺壁間。去其故土。而背施髹漆。匣以持獻。曾海曾廼。復獻韓平原韓誅簿錄送官。左爲汗青軒。軒後多古桂。兩傍環石柱。二小亭。曰蓬萊。曰濯纓。曰方壺。曰含章。曰茹芝。曰芸香。射亭曰繹志。曰采良門。采良二字。莫知所出。登渾儀臺。觀銅渾儀。紹興間。內侍邵諤所爲。精緻特甚。色澤如銀如玉。此器凡



二。一留司天臺。一留此以備測驗。最後步石渠。登秘閣。兩旁皆列龕。藏先朝會要及御書畫。別有朱漆巨匣五十餘。皆古今法書名畫也。是日僅閱秋收冬藏四匣畫。皆以鸞鵲綾象軸為飾。有御題者。則加以金花綾。每卷表裏皆有尚書省印。防閑雖甚嚴。而往往以偽易真。殊不可曉。其佳者。有董源畫孔子啖魚丘子圖。唐摹顧愷之洗經圖。此二圖絕高古。李成重巒寒澗。孫太古誌公展子虔伏生無名人三天女亦古妙。燕文貴紙畫山水小卷。極精。士雷小景符道隱山水關同山水。胡環馬陳晦栢文與可古木。便面亦奇。餘悉常品。不滿十焉。暇日想像書之。以為平生清賞之冠也。

布政分司五。曰管糧道。在蛾眉山麓。曰杭嘉湖道。在朝天門外。舊為巡視都察院。元時西天寺舊基也。延祐間。西僧板特達降香普陀山。過錢唐。建此。曰金衢嚴道。在太平坊。舊為鎮守府後宅。曰溫處道。在本司儀門外。曰寧紹台道。在運司河下。

都指揮使司。本元行宣政院也。洪武三年置杭州。



衛都指揮使司其時徐司馬以其故址開建八年改爲浙江都指揮使司設都指揮使同知僉事而王誠陳垣又拓大垣廨遂以前右二衛附焉其經歷司斷事司司獄司皆在司內  
都轉運鹽使司在湧金門內本宋轉運司治也太平興國二年開署于鳳皇山雙門內熙寧間徙建今所職司漕輓訊訟牒誅民利病領郡縣學校應詔選士其權甚重鹽課特其瑣事耳元至正十四年改爲都轉運鹽使專掌鹽課  
國朝因之設運使同知副使判官經歷知事

杭州府自吳越王已前在鳳凰山下宋南渡取爲行宮徙州治于竹園山滄因寺故址元時改爲杭州總管府  
皇明改爲杭州府設知府同知通判推官屬縣九經歷司照磨所司獄司皆在府內其府治正廳元時扁曰宣化後堂宋時扁曰簡樂洪武十五年郡守阮友竹扁曰思政嘉靖二十一年郡守陳仕賢建別館于儀門之外  
扁曰親賢宋有中和堂簡樂堂見廉堂聽雨軒恕堂愛民堂承化堂三桂堂史隱堂講易堂清明平軒景蘇堂玉蓮堂香遠樓並廢○中和堂



舊在鳳凰山府治嘉定間安撫趙時侃建之以存舊跡簡樂堂即今後堂是也時光宗以太子領兵奏書有訟簡刑清百姓和樂之語後二年郡守胡與可乃擴簡樂二字扁于堂且丐御書司業薛元鼎爲之記見廉堂咸淳間安撫潛說友得璽書有足見廉能之褒遂建堂而扁之曰見廉聽雨軒景定間安撫劉良貴建恕堂紹定間安撫金天錫建愛民堂淳祐間安撫趙與篋建承化堂三桂堂嘉定間安撫袁韶建吏隱堂紹興間安撫張澄建講易堂即吏隱堂也隆興

初陳輝改建清明亭潛說友建景蘇堂景定間安撫魏克愚建以文忠公嘗守郡有治績也王蓮堂亦舊府治所有後守重建于此魏克愚徙之錢唐門外潛說友遂即其廢址爲香遠樓高出城表平挹西湖山翠橫陳芙蓉布渚香遠而益清爲郡署最勝

杭州前衛指揮使司舊在錢唐門太平坊洪武八年徙都指揮使司大門之左統五千戶所杭州右衛指揮使司舊在泰和坊洪武八年徙都指揮使司大門之右統五千戶所



仁和縣舊名錢江縣吳越時在梅家橋西宋紹興三年遷觀橋東招賢坊元初遷于府左皇明洪武初復遷招賢四年知府劉文以縣附府爲便仍遷府左乃元時錄事司舊址也宋有無倦堂安敬堂

錢塘縣漢魏時在靈隱山麓平帝時更名泉亭尋復名錢唐徙錢湖門外唐武德四年避國號改唐爲塘徙錢塘門裏宋南渡後建景靈宮復徙紀家橋翠巖寺故址皇明洪武四年知府劉文徙于府右宋有畫簾堂勤清軒

杭州府儒學在運司河下府治之東宋初在通越門外鳳凰山之右紹興元年徙建于此并今府治皆泮因寺舊基也嘉定九年教授袁肅黃灝言于朝拓大之楊簡爲記紹定四年戶部侍郎余昉增置學田周端朝爲記元至正十二年燬於寇守臣帖睦烈思購禮佛寺之南得地八丈提舉王大本爲記二十二年又燬守臣夏思忠盡購禮佛寺地南北二百步東西一百六十步提舉楊翮爲記皇明洪武八年重新之水樂十八年火宣德初大理寺卿熊槩以上命重



建正統元年按察使軒輓增建號舍其制左爲大成殿右爲明倫堂即宋時養源堂也宋有八齋曰進德曰興能曰登俊曰持正曰崇禮曰賓賢曰志道曰尚志元減爲六又減爲四曰志道曰據德曰時習曰日新今仍之後爲崇文閣即宋時稽古閣也俗稱尊經閣內有宋高宗御書易詩書左氏春秋中庸大學學記儒行經解論語孟子等篇石刻臨安府尹趙礪老于太學建尊經閣積墨本閣上奠石刻閣下宋亡學廢元改爲西湖書院 皇明改仁和縣學後學徙而

石刻從之正德十三年提學副使徐蕃徙置府學而聖賢像替不理宗道統十三人替蘇子瞻表忠觀碑皆在焉學前爲凌雲橋即宋志所稱凌家橋○昌文侯祠本學士神也侯爲徐文慶宋岳武穆王飛部將有戰功飛死侯遂不祿孝宗理飛冤褒崇及其部將遂賜侯爲昌文侯牒克太學士神今仍奉祀焉○鄉賢祠在儀門外舊祀嚴子陵以下一十六人 皇明洪武中教授徐一夔增祀六人漢處士富春嚴光晉臨海太守錢唐范平晉中尉錢唐褚陶晉處士富春



孫晷齊處士鹽官顧歡梁參軍錢唐褚修梁處  
士錢唐范琰唐右僕射錢唐褚遂良唐禮部尚  
書鹽官褚無量唐大都督鹽官許遠唐諫議大  
夫給事中新城羅隱宋待中臨安錢惟演宋和  
靖先生錢唐林逋宋知制誥寓富陽謝絳本陳  
郡人宋諫院臨安錢彥遠宋八行先生仁和崔  
貢宋本學教授錢唐吳師仁宋贈太師鹽官張  
九成宋工部侍郎臨安滕茂實宋端明殿學士  
於潛洪咨夔宋吏部侍郎臨安俞烈宋知處州  
事昌化章樵宋刑部尚書餘杭趙汝談宋刑部

侍郎寓鹽官楊由義本汴人宋將作監丞富陽  
李鞞宋右丞相富陽李宗勉宋處士寓錢唐謝  
翱本閩人宋處士富陽朱清元尚書右丞富陽  
葉李元石塘先生寓錢唐胡長孺本永康人元  
湖南肅政廉訪使寓錢唐鄧文原本綿州人元  
處士寓錢唐劉夔本莆田人元處士錢唐劉汶  
元江浙儒學副提舉錢唐白珽元溧陽州儒學  
教授錢唐仇遠元處士錢唐吾衍元寧國路推  
官寓錢唐楊載本浦城人共皇明四川按察司  
僉事仁和王琦



仁和縣儒學宋紹興三年縣令孫廷直始建于觀橋之北即今貢院基是也洪武十一年教諭沈尊訓導卜埜瞿佑病其卑隘而宋太學在前洋街元改爲西湖書院者頗弘敞尊等言于朝請改爲縣學上許之天順三年巡按御史閻鵬以其迫近臬臺乃徙府學之右本元時試院也中爲明倫堂即宋時彞訓堂宋爲四齋曰教文教行教忠教信元因之今減爲二齋曰正心誠意

錢唐縣學宋紹興間建于長生老人橋西嘉熙四

年趙與權斥去其址至正十二年燬于兵皇明洪武三年知縣邵復亨以秋隘購地佑聖觀之西遂以建學九年僉事潘繼祖重新之正統初按察使軒輓增建號舍爲門口集賢景泰間副使鄺彥譽增置什物宋分六齋曰友善辯志教文教行教忠教信元減爲四今減爲二曰進德修業

織造府在旗纛廟西掌供御用袍服以中官掌之洪武二年初建織染局于斯如坊朱家橋永樂中因地卑濕分撥工料於湧金門建局織造



遂以舊名南局此名北局後南局盡廢而工料併歸北局

吳山書院故鎮守府也元時為平準行用庫俗稱

倒鈔庫 國初因之正統間命內臣鎮守各省

改為府署嘉靖間革除鎮守改為吳山書院

市船司本宋德壽宮後圃也未樂中命內臣掌海

舶互市于此內有芙蓉石高丈許竇穴玲瓏蒼

潤可愛

杭州府稅課司在文錦坊西洪武五年建

林驛在芝松坊吳元年建于武林門外洪武二

年從建于此

鹽倉批驗所在艮山門內元時名檢校批驗所

國初因之洪武十五年改今名

惠民局在吳山書院北洪武十七年置醫學于此

西湖遊覽志第十五卷終




蘇軾題名第十正卷終

8

蘇軾題名第十正卷終

蘇軾題名第十正卷終

蘇軾題名第十正卷終





南